

የሐኪሴም ያኦሲ ፔጋሲ ዳዌ ባኮ ዓይያ ካሮ"

የሐኪሴም ያኦሲ ፔጋሲ ዳዌ ባኮ ፃኦፕንቴሚ ኪሪሰቶሴ ጉሙርቃዘንሢ፡ ዩሱስ ኪሪሰቶሴ ፔኤኮ ጎዳ ማሂ ሃሃ ያኦሲም ዲማዴያ ማዒ ናንጋሢሮ ዒዲንቲ ዳኪንቲ፡ ዔያታ ሜታዲ ዎዶ"ናኬ፤ ፃኦፕ ዓሢኮ ዴኤፖ ማሊፃ' ናባባ ዓሶኮ ሃጊ ማዓንዳ ዎዘ" ጎኔ ዎዘ ማዓንዳጉዲ ዶዲሻኒና ዔያቶ ሄሌ" ዒዲንቲ ዳኪንቲያ ሜታሢዳ ዔያታ ያኦሲ ጉሙርቁያና ዶዳንዳጉዲኬ።

ማፃኦፔሎኮ ባሺሢ፡ ሚርጌ ሃሃ ዎሊ ሄሊ" ሄሊ" ዓኦ ባኮ የሐኪሴም ያኦሲ ፔጋሲ ዳዌ ባኮ ኬኤዛያ ማዓዛ ዬንሢ፡ የሐኪሴም ያኦሲ ፔጋሲ ዳዌ ባኮንሢ ዬና ዎዶ"ና ዓኦ ኪሪሰቶሴ ጉሙርቃ ዓሶ ማኦዳ"ኒ ዳንዳዓያ፡ ሜሌ" ዓሶም ጋዓንቲ ዓኦሺንታ ባኦዚ" ማዒ ማሊሲ ጌሰቶናያኬ። ዓይኑሞኮ ላሚ ላሚ ጌይንታ ማሊያጉዲ ሐኖ" ማፃኦፕኮ ጌሊያ ካራ" ካራ" ጉቤ ዲማ ዲማ ያኦሲ የሐኪሴም ፔጋሲ ዳዌ ባኮ ዲማ ዲማ ጎይሢና ላሚ ላሚ ኬኤዚንቲ፤ ማፃኦፔሎኮ ቡሊ"ያይዳ ዲማ ዲማ ማሊሢ ዓኦያታቴያ ዴኤፖ ማሊፃ ጋዓንቲ ዔርቴያኬ፤ ዩይያ «ጎዳ ማዔ፡ ኪሪሰቶሴ ዛሎ"ና ያኦሲ ላሚሱዎ ጎይሢ ፔቴ"ና ፃላሄንታ ቃሲ" ሜሌ" ሞርኮዎ ቢያ ባሻንዳኔ፤ ዒ ባሺ ዎዶ"ና ዒ ዛም ጉሙርቁንታያ ማዔ፡ ዒጊኖንሢም ዓኪ ጫሪንቲና ዓኪ ሳናናኮ ዓንጅ ዔያቶም ዒንጋንዳኔ» ጋዓያኬ።

ማፃኦፔላ ዲማ ዲማ ዓርቁ ባኮ

- ዓይያ ካሮ" 1፡1-8
- ላንካዎ ሺኢጲያ ማኦሮም ዳኪንቲ ኪኢቶ" 1፡9—3፡22
- ላንካዎ ዔርዛ ማላቶና ማሪንቲ ማፃኦፕ 4፡1—8፡1
- ላንካዎ ዛያሢ ዛሎ" 8፡2—11፡19
- ዴኤፖ ሾኦዣሢና ላምያ ቦያንሢና ዛሎ" 12፡1—13፡18
- ያኦሲ የሐኪሴም ፔጋሲ ዳዌ ዲማ ዲማ ባኮ 14፡1—15፡8
- ላንካዎ ያኦሲኮ ጎሪ"ንቶ ዑኮ 16፡1-21
- ባብሎኔኮ ባይሲንቶ፤ ሃሃ ቦያንታ ሎኤተሞና ያኦሲ ማሊያ ኬኤዛያ ማላ ዓሶንታ ፃላሄንታኮ ባሺንቲያ 17፡1—20፡10
- ጋፒንያ ዎጎ 20፡11-15
- ዓኮ ጫሪንጮንታ ዓኮ ሳያንታ ዓኮ ዩሩሳላሜ ካታሜሎንታ ዛሎ" 21፡1—22፡5
- ጋፒንሢ ማሊሢ 22፡6-21

1 ሐይ የሐኒሴም የኦሲ ፔጋሲ ዳዌ ባካ፡- ዑኬ ማዓንዳ ባኮ የኦሲ ፔኤም ማዳዘንህም ዳዋንዳጉዲ ዬሱስ ኪሪስቶስም ዳዌያኬ፤ ዬሱስ ኪሪስቶስም ፔ ኪኢታንቻህ ዳኪ ዒዛም ማዳ የሐኒሴም ሃያ ባኮ ፔጋሲ ዳዌ።

2 የሐኒሴያ የኦሲ ቃኦሎ"ና ዬሱስ ኪሪስቶስ ማርካዳ ባኮ ዛሎ" ቢያ፤ ሐሣ ዒ ዛጌ ባኮዋ ቢያ ፔኤሮ ማርካዲ ኬኤዜ።

3 ዬይ ቢያ ማዓንዳህ ዑኬ ዎይይዳታህረ ሃኖ" የኦሲ ማሊያ ኬኤዛ ማፃኦገ ናባባ ዓህረ ዓንጅ ዎዛ ዳንቃንዳ፤ ዬያጉዲ ኬኤዚንቴ የኦሲ ማሊያ ዎይዛዘንህረና ፃኦገንቴህ ኩንህህረ ቢያ ዓንጅ ዎዛ ዳንቃንዳ።

ዒሲያ ዓጫ" ዓኣ ለንካዎ ሺኢጲያ ማእሮንህም ዳኪንቴ ሳራሥህ

4-5 ዒሲያይዳ ዓኣ፡ ለንካዎ ሺኢጲያ ማእሮ ዓሶዎ የሐኒሴይዳገ ዳኪንቴ ሳራሥህ፡-

ሐህ ዓኣህ፡ ሚናገ ናንጋህና ሃጊ ሙካንዳ የኦሲዳገ፡ የኦሲ ካኦቱዎ ያይቶ ቤርታ ዓኣ ለንካዎ ዓያኖንህዳገ፤ ሃሃ ጉሙርቁንታያ ማዔህዳገ፡ ሐይቢገ ዔቁፆና ኮይሪ ማዔህዳገ፡ ዓጮ" ካኦቶ" ዎይሃያ ማዔ፡ ዬሱስ ኪሪስቶስይዳገ ኮሹዎና ዎዛና ዒንህም ማፆንጎ።

ኑና ናሽኬህም፡ ፔ ሱጉፆና ሻንቁ ጎማገ ኑና ጌኤሽህም፡

6 ዒዛኮ ዓዳህ ማዔ፡ የኦዛህም ኑኡኒ ቁኤሴ ማዒ ማዳንዳጉዲ ካኦቱዎ ኑም ዒንጌ፡ ዬሱስ ኪሪስቶስም ቦንቸና ዎልቁና ናንጊና ማፆንጎ፤ ዓኣሜን።

7 ዒዚ ሻኦሪና ሙካንዳ፤ ዒዛ ጫርጌ ዓሳኣ ዓቱዎፆ ዓሲ ቢያ ዒዛ ዛጋንዳ፤ ሳፆይዳ ዓኣ ዳራ" ቢያ ዒዛ ዛሎ"ና ዬኤካንዳ፤

ሂዮ! ዬይ ባካ ቢያ ጎኔ ማዓንዳ፤ ዓኣሜን።

8 «ሐህ ዓኣህንታ ሚናገ ናንጋህ ሃሃ ሐጊያ ሙካንዳህ፡ ቢያ ባኣዚ" ዳንዳዓ ጎዳ ማዔ የኦሲ ዔኤቢ ቢያ ዓርቃህና ጋገሳህና ታናኬ» ጋዓ።

ኪሪስቶስኮ ፔጋዲ ጴዲያ

9 ታኣኒ ዒንህኮ ዒሻህ ማዔህ፡ ዒንህና ዎላ" ኪሪስቶስኮ ሜታህና ዓኣ ካኦቱዎና ሃሃ ጊቢ" ዳንዳዒፆና ዳንቃያ ማዔ፡

1:4-5 ኬሲ. ማፃ 3፣14፤ ዮሐ. የፔዳ 4፣5። 1:4-5 ዒሲ. 55፣4፤ ዓይኑ. 89፣27።
1:6 ኬሲ. ማፃ 19፣6፤ ዮሐ. የፔዳ 5፣10። 1:7 ዳኣኔ. 7፣13፤ ማጉ. 24፣30፤ ማር. 13፣26፤ ሉቃ. 21፣27፤ 1ቴሲ. 4፣17፤ ዛካ. 12፣10፤ ዮሐ. 19፣34። 1:8 ዮሐ. የፔዳ 22፣13፤ ኬሲ. ማፃ 3፣14።

ዮሐንሴም ያኦሲ ቃኦሎ"ና ዩሱሴ ዛሎ"ናሮ ማርካዳሢሮ ፒዳሞ ጌይንታ ዋኦያ ሳዛ" ዓኣ ዓጩሎይዳ ቱኡቲ ዓኣዮ:-

10 ጎዳ ከሎ"ና* ዓያና ጌኤሺኮ ዎልቆ ጋሮ ጌሊ ታ ዓኣንቴ ዛዬ ዑኡሲጉዳ ዴኤፒ ዑኡሲ ታኣኮ ጊንሢና:-

11 «ኔ ዛጋ ባኮ ማፃኣፔይዳ ፃኣፒ ላንካዎ ሺኢጲያ ማኣሮም ጌይፃ:- ዔፕሶኔም፣ ሴሚርኔሴም፣ ጴርጋሞኔም፣ ቲያዲርኔም፣ ሴርዴሴም፣ ፒላዴልፒያና ሎዶቂያናም ዳኬ» ጋዓንቴ ታ ዎይዜኔ።

12 ዬያ ታኣም ዎ ከኤዛቴያ ዔራኒ ጊንሢሞ ታ ሺሬኔ፤ ዩማና ላንካይ ዎርቄፓ ኮሾ"ና ፖሲ ጌሦ ሻርና ታ ዴንቄኔ፤

13 ዬንሢ ሻርኖ ባኣካ" ዓሲ ናዓሢ ማላ ዓሲ ታ ዴንቄኔ፤ ዒዚያ ቶኮ ሄላ" ዎደሲ ማኣዎ ማይንቴያ፣ ዳዶ"ይዳ ዎርቄይዳፓ ኮሺ"ንቴ ቃልሾ ቱኪ" ዓኣኔ።

14 ዒዛኮ ቶኦኮ"ንታ ቶኦኮ" ጋፓኖንታ ቦኦሬ ማራይ ጋፓኔጉዴያ ሃሣ ሻቺጉዲ ቦኦሬከኔ፤ ዓኣፓኣ ዔኤታ ታሚጉዲከኔ፤

15 ቶካ ጊንሢ ላንታሚዳ ዓጊ፣ ጌልፒ ዘቁሶና ዓንጊ ማላያከኔ፤ ዑኡዛ ሃሣ ዴኤፒ ሶኦሬንታ ዎኣሢ ጉኡማያጉዲከኔ።

16 ሚዛቆ ኩጮይዳ ዒዚ ላንካይ ዠኦጌ ዓርቁ ዓኣኔ፤ ዳንጋፓ ዒዛኮ ቢያ ዛላ" ዓጩ ማዔ፣ ጩንቻ ዓፓሮ ከሰካኔ፤ ሃሣ ዒዛኮ ዓኣፖ ካራ" ሚርጌና ፖዓ ዓቢጉዲ ፖዓያከኔ።

17 ዬያ ታ ዛጋፓ ዶሊንቴ፣ ቶኮ ዴማ" ዒዛኮ ሎኦማዛ ዒዚ ጋዓንቴ ሚዛቆ ኩጮ ታ ዑፃ ጌሣዮ:- «ዒጊጨፓ፤ ዔኤቢ ቢያ ዓርቃሢና ጋፒሳሢና ታናከኔ፤

18 ሺምፔና ታ ናንጋያከኔ፤ ሓያኮ ቤርታ ታ ሓይቄኔ፤ ጋዓንቴ ሓይሾ ታኣኒ ናንጊና ሓይቄዎና ናንጋያ ማዔኔ፤ ሓይቢና ሓይቄ ዓሳ ዴዓ ቤዘናይዳ ቢታንቶ ታኣኮ ዓኣኔ» ታኣም ጌዔኔ።

19 ሓሣ ዒ ከኤዛዮ:- «ዓካሪ ኔ ዛጌሢና ሃሢ ዓኣ ባኮና ሃጊ ማዲንታንዳ ባኮና ፃኣፔ፤

20 ታኣኮ ሚዛቆ ኩጮ ኔ ዛጌ፣ ላንካዎ ዠኦጌንሢና ፖዎ ጌሦ ላንካዎ ዎርቆ ሻርኖንሢኮ ዓኣሺንቴ ማሊፃ ያዲከኔ፤ ላንካዎ ዠኦጌንሢ:- ላንካዎ ሺኢጲያ ማኣሮኮ ኪኢታንቶከኔ፤ ላንካዎ ፖዎ ጌሦ ሻርኖንሢ:- ላንካዎ ሺኢጲያ ማኣሮከ» ጌዔኔ።

* **1:10 ጎዳ ከሎ"ና**- ጌይፃ ጎዳ ሓይባ"ፓ ዔቄ ከሎ"ከኔ፤ ሃሣ ኪሪሰቶሴ ጉሙርቃ ዓሳኣ ካኣኦ ካኣሻካ ከሎ"ከኔ። **1:13** ዳኣኔ. 7፣13፤ 10፣5። **1:14** ዳኣኔ. 7፣9፤ 10፣6። **1:15** ሂዚ. 1፣24፤ 43፣2። **1:17** ዒሲ. 44፣6፤ 48፣12፤ ዮሐ. ዎፔዳ 2፣8፤ 22፣13።

2

ዔፕሶኔ ሺኢጲያ ማኣሮም ኬኤዚንቴ ባኣዚ"

1 ሐሣ ኬኤዚያ:- «ዔፕሶኔ ሺኢጲያ ማኣሮ ኪኢታንቻሣም ሂዚ ጌይ ፃኣፔ፤

«ሐይ: ለንካዎ ዦኦጋሣ ፔኤኮ ሚዛቆ ኩጫ ዓርቄሣና ለንካዎ ዎርቆ ሻርኖ ባኣኮ"ይዳ ሃንታ ዓሣ ኬኤዚያኬ፤

2 ኔኤኮ ማዶ"፣ ዶዲ ኔ ማዳ ማዶ" ሃሣ ገቢ" ዳንዳዲዎዎ ታ ኔኤሲ" ዔራኔ፤ ፑርቶ ዓሶ ዛገ ኔ ዘቲ ጌይባኣሣ፤ ሃሣ ያኦሲ ማዶ"ም ዳኪንቴባኣያታዎ <ኦ ዳኪንቴያኬ> ፔና ጋዓዞንሣ ዛገ ዳግሲ ሉኡዚ ዔያታ ማዔሣ ኔ ዔራሣያ ታ ዔራኔ።

3 ዬያጉዲ ገቢ" ዳንዳዲ፣ ኔኤኮ ዶዲያና ታ ሱ"ንፆሮ ቤልፃዲዎዎ ዶዲ ሜታሣ ኔ ዔኬሣ ታ ዔራኔ።

4 ጋዓንቴ ፔቴ" ታ ኔኤኮ ቦሃ ባኣዚ" ዓኣኔ፤ ዬና ዓይጎዳይ ጌዔቴ ኔኤኮ ቤርታኣ ናሹ"ም ኔ ሃሹ"ኔ፤

5 ዓካሪ ኔ ሐኣዲ ሎኦማንዳሣኮ ቤርታ ዎካ ኔ ዓኣቴያ ማሊ ጳቂሣ፣ ጎሞዎ ኔኤኮ ቡኡፃ፤ ቤርታ ማዳሣጉዲ ማዶ፤ ዬያ ቢያ ኔ ማዶባኣቴ ታ ኔ ኮይላ" ሙካንዳኔ፤ ጎሞዎ ኔ ቡኡፃባኣቴ ፖዎ ጌሃ ሻርኖ ቤዛፓ ታ ኔኤኮ ሺኢሻንዳኔ።

6 ጋዓንቴ ታ ኔና ሄርሻ ፔቴ" ባኣዚ" ዓኣኔ፤ ዬና:- ታኣኒ ዒፃ፣ ኒቆላ ዓሶኮ ማዶ" ኔኤኒያ ዒፃሣኬ።

7 «ሺኢጲያ ማኣሮ ዓሶም ዓያና" ጋዓ ባኮ ዎይዛ ዎይዚ ዓኣሣ ዎይዞንጎ! ያሎና ባሼሣ፣ ያኦሲ ኮሼ"፣ ኮዦ ቤዛ ዓኣ ሹምፖ ዒንጋ ሚፃሣ ዓኣፖ ታ ሙኡዛንዳኔ።»

ሴሜርኔሴ ሺኢጲያ ማኣሮም ኬኤዚንቴ ባኣዚ"

8 ሃሣ ዒዚ ኬኤዚያ:- «ሴሜርኔሴ ሺኢጲያ ማኣሮ ኪኢታንቻሣም ሂዚ ጌዒ ፃኣፔ፤

«ሐይ: ዓይፃሣና ጋፒንፃሣና ማዔያ ሃሣ ሃይቄዎዎ ሹምፖና ዓኣያ ማዔሣ ኬኤዚያኬ፤

9 ኔኤኮ ሜታሣና ማንቃቶና ታ ዔራኔ፤ ያዲ ማዔቴያ ኔ ያርጎቹኬ፤ ዓይሁዴ ዓሲቱዎዎ <ኦ ዓይሁዴኬ> ፔና ጋዓ ዓሶንታ ፃላሄ ዓሲ ማዔ ዓሶንታ ሱ"ንፆ ኔኤኮ ፑርቲሳሣ ታ ዔራኔ፤

10 ኔና ሄላ"ንዳ ሜታሣ ዒጊጨፖ፤ ሐኣዛጉዎቴ፣ ፃላሄ ዒንሣ ዎይታቴያ ዛጋኒ ዒንሣዳፓ ፔቴ" ፔቴ" ዓሶ ቱኡሲ ማኣሪ ጌልዚ ቱኪ"ሴም፣ ታጳ ኬሊ" ዒንሣ ሜታዳንዳኔ፤ ጋዓንቴ ሐይቢ

2:7 ማዢ. ማፃ 2:9፤ ሂዚ. 28:13፤ 31:8። 2:8 ዒሲ. 44:6፤ 48:12፤ የሐ. ያፔዳ 1:17፤ 22:13።

ሄላ "ንዳኣና ጉሙርቁንታያ ማዕፍ፤ ቦንቸ ዲንጎ ባኣዚ" ማሂ
ዒንጊንታ ናንጎ ታ ኔኤም ዒንጋንዳኔ።

11 «ሺኢጲያ ማኣሮም ዓያና" ጋዓ ባኮ ዋይዛ ዋይዚ ዓኣሂ
ዋይዘንጎ! ያሎና ባሼሂ፡ ላምዓሳ ሓይባ" ዋኦታንዳ ባኣዚ" ባኣሴ»
ጌዔኔ።

ጴርጋሞኔ ሺኢጲያ ማኣሮም ኬኤዚንቴ ባኣዚ"

12 ሐሣ ዒ ኬኤዛያ፡- «ጴርጋሞኔ ሺኢጲያ ማኣሮ
ኪኢታንቻሂም ሂዚ ጌዒ ፃኣፔ፤

«ሐይ፡ ላምዖ ዛላ" ዋርቁንቴ ጨንቾ ዓጋፎ ዓርቁሂ
ኬኤዘያኬ፤

13 ኔኤኒ ፃላሂኮ ካኣቱሞ ያይታ" ዓኣ ቤዛ ዓኣሂ ታ ዔራኔ፤ ያዲ
ማዕቴያ ታ ሱንያ ዶዲ ኔ ዓርቁኔ፤ ካኣዠሞ ኔ ሃሺ" ባኣሴ፤ ሃሃ
ታኣኮ ጉሙርቁንታ ማርካ ማዕ ዓንቲጲሴ ዬያ ፃላሂ ካኣታዳ፡
ዒንሂ ካታማ ዋዲንቴ ዋዶ"ናታያ ኔ ታና ጉሙርቁያ ሃሺ" ባኣሴ።

14 ያዲ ማዕቴያ ታ ኔኤኮ ቦሃ ፔቴ" ፔቴ" ባኣዚ" ዓኣኔ፤ ዬና
ዓይጎዳይ ጌዔቴ ባኣላኣሜ ጎሃሂኮ ዔርዚያ ዓርቁ ፔቴ" ፔቴ" ዓሲ
ዒንሂ ባኣካ" ዓኣኔ፤ ዬይ ባኣላኣሜ ዒሰራዔኤሌ ዳራ" ሜሌ"
ካኣሺም ሹከንቴ ዓሽኮ ሙዓንዳጉዲና ማቾ ሃሃ ዓኒ ማዒባኣያና
ላሂ፡ ዳቡንታንዳጉዲ ማሆም ጌዒ ባኣላኣቁ ጎሃሂ ዒ ዘሬ
ዘሮ"ኬ።

15 ዬያጉዲ ሃሃ ኒቆላ ዓሶኮ ዔርዚያ ዓርቁ ዓሲያ ዒንሂ
ባኣካ" ዓኣኔ፤

16 ዬያሮ ጎሞ ኔኤኮ ቡኡፃ! ሃንጎ ዑኬና ታ ኔ ኮይላ" ሙኪ፡ ታ
ዳንጋጋ ኬሰካ ጨንቾ ዓጋፎና ታ ዔያቶ ጫርጋንዳኔ።

17 «ሺኢጲያ ማኣሮም ዓያና" ጋዓ ባኮ ዋይዛ ዋይዚ ዓኣሂ
ዋይዘንጎ! ያሎና ባሼሂም ዓኣቸ፤ ጌሦና፡ ማና" ጌይንታ ሙያ ታ
ዒንጋንዳኔ፤ ሃሃ ጊንሃ ዓኪ ሱንሂ ጌዳ" ፃኣፕንቴ፡ ቦኦሬ ሹቸ፤ ታ
ዒዛም ዒንጋንዳኔ፤ ዬና ዔኬ ዓሂዳጋ ዓታዛ ሜሌ" ያኦኒያ ዬና
ሱንፃሎ ዔራንዳያ ባኣሴ» ጌዔኔ።

ቲያዒሮኔ ሺኢጲያ ማኣሮም ኬኤዚንቴ ባኣዚ"

18 ሐሣ ዒ ኬኤዛያ፡- «ቲያዒሮኔ ሺኢጲያ ማኣሮ ኪኢታንቻሂም
ሂዚ ጌዒ ፃኣፔ፤

2:11 የሐ. ያፔሳ 20፡14፤ 21፡8። 2:14 ፓይ. ማፃ 22፡5፤ 7፤ 31፡16፤ ላሚ.
ዋማ 23፡4፤ ፓይ. ማፃ 25፡1-3። 2:17 ኬሲ. ማፃ 16፡14-15፤ 16፡33-34፤ የሐ.
6፡48-50፤ ዒሲ. 62፡2፤ 65፡15።

«ሐይ፡ ዔኤታ" ታሚ ማላ ዓኣፒ ዓኣያ፤ ሃሃ ታሚዳ ዓገ፡ ገልፒ ዘቀሶና ዓገገ ማላ ቶኪ ዓኣ፡ ያኦሲ ናዓሢ ኬኤዜያኬ፤

19 ታ ኔኤኮ ማደ"፡ ናሹሞ፡ ጉሙርቂዖ ሃሃ ኔኤኒ ዔኤዒ ማደ ማደ"ንታ ገቢ" ዳንዳዒ ዶዲያንታ ዔራኔ፤ ቤርታኣሰካፓ ሃሃ ኔ ባሼ ማደሢያ ታ ዔራኔ።

20 ጋዓንቴ ፔቴ" ታ ኔኤኮ ቦሃ ባኣዚ" ዓኣኔ፤ ዬና፡- «ያኦሲ ማላሢ ታ ኬኤዛያኬ» ጋዓ ላኣሌሎ፡ ዔልዛቤሎኮ ማደ" ኔ ዛገ ዚቲ ገዔኔ፤ ዒዛ ጋዓንቴ ታኣም ማደ ዓሳ ማቾ ሃሃ ዓኒ ማዒባኣያና ላሃንዳጉዲና ሜሌ" ካኣሺም ሹኪንቴ ዓሸኮ ሙዓንዳጉዲ ዔርዚሢና ዓሶ ዳቢሼኔ።

21 ዒዛ ጎሞ ፔኤኮ ቡኤፃንዳጉዲ ቤሲ ታ ዒዛም ገሢኔ፤ ዒዛ ጋዓንቴ ጎሞ ፔኤሲ" ቡኤፃኒ ኮይባኣሴ።

22 ዬያር ሃርገሺ ታ ዒዛ ላይሃንዳኔ፤ ዒዛና ዎላ" ማደ ፑርቶ ማደ" ቡኤፃ ሃሸ"ባኣቴ ዒዛና ዎላ" ላሃ ዓሶ ቢያሢዳ ዴኤፒ ሜቶ ታ ዔኤከ ዬዓንዳኔ፤

23 ዒዛና ዎላ" ዬያ ማደ ዓሶ ታ ዎዳንዳኔ፤ ሺኢጲያ ማኣሮ ዓሳ ቢያ ዓሲኮ ዒኔ ማላሢ ጋፒሲ ዛገ ታኣኒ ዔራያ ማዔሢ ዔራንዳኔ፤ ዒንሢ ፔቴ" ፔቴ"ሢም ዒንሢኮ ማደ" ጎይያ ታ ዒንጋንዳኔ።

24 «ዒንሢ፡ ቲያፀርኔይዳ ዓኣያታዎ ሐያ ፑርቶ ዔርዚያ ዔከ ባኣዘንሢም ቢያ ዬያጉዲ ፔቴ" ፔቴ"ዘንሢ ፃላሃኮ ሃይ ዓኣሸንቴ ማላሢኬ» ጋዓ ማሊያይዳ ገለባኣዘንሢም፡ ሜሌ" ዴኤሢ ዓይሥሢ ታ ዒንሢም ዓይሃዓኬ፤

25 ጋዓንቴ ታኣኒ ሙካዳንያ ሃላ"ንዳኣና ዒንሢኮ ዓኣ ጉሙርቂዖ ዶዲሺ ዓርቁዎቴ ታ ጋዓኔ።

26 ያሎና ባሼሢ ታኣኮ ማደ" ጋፒንሢ ሃሊ"ሲ ዶዲ ማደሢም ሜሌ" ዴሮ" ዑፃ ቢታንቶ ታ ዒንጋንዳኔ፤

27 ዒዚ ዔያቶ ሄ'ርቁ ዎይሃንዳኔ፤ ዓጪና ማዦና ሜሄጉዲ ዎዲ ዒ ጋኣጫንዳኔ» ዬይ ቢታንታ ታኣኒ ታ ዓዶይዳፓ ዔኬ ጎይያጉዴያኬ፤

28 «ዒ ባሻያ ማዒያ ዔርዚኒ ካሪያ ዦኣጎ ታ ዒዛም ዒንጋንዳኔ።

29 «ሺኢጲያ ማኣሮም ዓያና" ጋዓ ባኮ ዎይዛ ዎይዚ ዓኣሢ ዎይዘንጎ!» ገዔኔ።

3

ሴርዴሴ ሺኢጲያ ማኣሮም ኬኤዚንቴ ባኣዚ"

2:20 1ካኣቶ". ማ 16፡31፤ 2ካኣቶ". ማ 9፡22፤ 30፡

1 ሐሣ ዒ ኬኤዛዎ፡- «ሴርዴሴ ሺኢጲያ ማኦር ኪኢታጎቻሣሣ ሂዚ ጌዒ ፃኣፔ፤

«ሐይ፡ ያኦሲኮ ለጎካዎ ዓያኖንሢና ለጎካዎ ዠኦጎንሢ ኩጫ ዓርቄሢ ኬኤዜያኬ፤ ማደ" ታ ኔኤኮ ዔራኔ፤ ሱንጎዎና ኔኤኒ ዋሊ"ኬ፤ ጋዓንቴ ኔ ሐይቄያኬ።

2 ዬያሮ ጴጤ፡ ኔኤኮ ማደ" ታ ያኦዛሢ ሴርታ ፒዜ ማዔም ታ ዴንቁባኣሢሮ ሐይቃኒ ዑኪ ዓኣ፡ ዓቴ" ባኮ ኔኤኮ ደዲሹ።

3 ዓካራ፡ ሴርታ ኔ ዋዚጉዴ ዔራቶ ዔኬያታቶዋ ሃሣ ዋይዜያታቶዋ ማሊ ጳቂሢ ካፔ፤ ጎሞዋ ኔኤኮ ቡኡጭ፤ ጋዓንቴ ኔ ጴጤባኣያ ማዔቴ ዉሲጉዲ፡ ኔ ዔራዋንቴ ታ ሙካንዳኣኬ፤ ዎም ዋዴ ታ ሙካንዳቴያ ኔ ዔራዓኬ።

4 ጋዓንቴ ፔኤኮ ማኦሣሢ ከንቁሲባኣ፡ ዳካ" ዳካ" ዓሲ ኔኤና ዋላ" ሴርዴሴይዳ ዓኣኔ፤ ታኣና ዋላ" ዔያታ ዓኣዳንዳያ ኮይሳያታሢሮ ቦኦሬ ማኦያ ማይንቴ ታኣና ዋላ" ዓኣዳንዳይ።

5 ያሎና ባሹሢ" ዔያቶጉዲ ቦኦሬ ዓፒላ ማይንታንዳይ፤ ሱንጎዎ ዒዛኮ ታኣኒ ታ ዓደና ኪኢታጎቻናም ዔርዛንዳይ፤ ናንጊና ናንጋ ዓሲኮ ሱንጎዎ ፃኣፔንጎቴ ዓኣ፡ ናንጎ ማፃኣፖይዳፓ ሱንጎዎ ታ ዒዛኮ ባይዛዓኬ።

6 «ሺኢጲያ ማኦሮም ዓያና" ጋዓ ባኮ ዋይዛ ዋይዚ ዓኣሢ ዋይዞንጎ!» ጌዔኔ።

ፒላዴልፒያ ሺኢጲያ ማኦሮም ኬኤዚንቴ ባኣዚ"

7 ሐሣ ኬኤዛዎ፡- «ፒላዴልፒያ ሺኢጲያ ማኦሮ ኪኢታጎቻሣሣ ሂዚ ጌዒ ፃኣፔ፤

«ሐይ፡ ያኦሲም ዲማዴያ ሃሣ ጎኔ ማዔ፡ ካኣቲ ደውቴ ቁልፖ ኩጫ ዓርቄሢ ኬኤዜያኬ፤ ዒዚ ቡሌ"ሢ ያኦኒያ ዎዲዋሴ፤ ዒዚ ዎዴሢ ያኦኒያ ቡሌ"ዋሴ።

8 ማደ" ታ ኔኤኮ ዔራኔ፤ ሐይሹ፡ ያኦኒያ ዎዳኒ ዳንዳዑዋ ቡሊ"ንቴ ካራ ታ ኔ ሴርታ ጌሢኔ፤ ዎልቃ ኔኤኮ ዳካ" ማዔሢ ታ ዔራኔ፤ ማዔቴያ ታ ቃኣሎ" ኔ ካፔኔ፤ ታ ሱንጎዎ ኔ «ዔራዋሴ» ጌይ ሃሽ"ባኣሴ።

9 ዓካራ፡ ዓይሁዴ ማዒባኣዎ «ኑ ዓይሁዴኬ» ጋዓ ዓሲና ፃላሃ ዓሲ ማዔዞንሢሮ ሃሣ ሉኡቃዞንሢ ሙኪ ኔ ቶኮ ዴማ" ሎኦሚ ኔኤም ዚጋንዳጉዲ ታ ማሃንዳይ፤ ታ ኔና ናሽካያታሢ ዔያቶ ታ ዔርዛንዳይ።

3:3 ማቴ. 24፡43-44፤ ሉቃ. 12፡39-40፤ ዮሐ. ያፔጳ 16፡15። 3:5 ኬሲ. ማግ 32፡32-33፤ ዓይኑ. 69፡28፤ ዮሐ. ያፔጳ 20፡12፤ ማቴ. 10፡32፤ ሉቃ. 12፡8። 3:7 ዒሲ. 22፡22፤ ዒዮ. 12፡14። 3:8 ዒሲ. 49፡23፤ 60፡14፤ 43፡4።

10 ገቢ " ደንዳዳ ማዕኔ ታ ኔኤም ገዕሚ ኔ ካፕሢር ሳዖይዳ ናንጋ ዓሳ ወይታቲያ ዛጋኒ ገዕሪ ዓጮ" ቢያይዳ ሙካንዳ ማታሢዳጋ ታ ኔና ካፓንዳኔ።

11 ታኣኒ ዑኩና ሙካንዳኔ፤ ቦንቺ ኔኤም ዒንጎ ባኮ የኦኒያ ኔኤሲ" ዔኩዋጉዲ ኔኤኮ ዓኣ ባኮ ደዲሺ ዓርቄ።

12 ያሎና ባሺሢ፤ ታ ያኦዛሢኮ ገኤገፍ ማኦሮይዳ ቱርቱር ታ ማሃንዳኔ፤ ዩካፓ ዒ ዓገፃዓኬ፤ ታ ያኦዛሢኮ ሱንጎጎታ ታ ያኦዛሢኮ ካታሞ ሱንጎጎታ ዒ ዛይዳ ታ ያኦጋንዳኔ፤ ዩና ካታሜላ ጫሪጎጮ፤ ታ ያኦዛሢ ኮራፓ ኬዳንዳ ዓኮ ዩራሳላሜኬ፤ ታኣኮዋ ዓኮ ሱንጎጎ ዒ ዛ ዑፃ ታ ያኦጋንዳኔ።

13 «ሺኢጲያ ማኦሮም ዓያና" ጋዓ ባኮ ወይዛ ወይዚ ዓኣሢ ወይዘንጎ!» ገዕኔ።

ሎዶቂያ ሺኢጲያ ማኦሮም ኬኤዚንቴ ባኣዚ"

14 ሐሣ ዒ ኬኤዛዖ፡- «ሎዶቂያ ሺኢጲያ ማኦሮ ኪኢታንቻሢም ሂዚ ገዕሪ ያኣፔ፤

«ሐይ፡ ጎኔ ማዕያ፡ ጉሙርቂንታያ፡ ጎኔ ማርካ ማዕያ፤ ሃሣ ያኦሲ ማዢንታ ቢያ ዒ ዛ ዛሎ"ና ማዕሢ ኬኤዜያኬ፤

15 ኔኤኮ ማዶ" ታ ዔራኔ፤ ሺሜታቲ ሺሜ፡ ያይዲታቲያ ኔ ያይዲቱዋሴ፤ ኔኤኒ ሺሜ ሃንጎ ያይዲታቲ ኮሺታዖ ዓቴ"ኔ፤

16 ያዲ ኔ ማዑዋዖ ጉሪ ቦልዕ ቦልዕ ጋዓያታሢር ጳንጋፓ ታ ኔና ጩታኒኬ፤

17 ታኣኒ ያርጎቺኬ፤ ሚርጌ ቆሎ ታኣኮ ዓኣኔ፤ ታኣም ፓጩ፡ ዓይጎ ባኣዚ"ያ ባኣሴ ኔ ጋዓኔ፤ ጋዓንቴ ኔ ማታዳያ፡ ማንቃቶና ዓሲኮ ዋልቃ ጌላያ፡ ዔኤቢባኣ ማንቆ፡ ዓኣፒ ባይቂያ፤ ሃሣ ካሎ"ታሢያ ኔ ኔና ዔራዋሴ፤

18 ኔኤኒ ያርጎጫኒ፡ ታሞይዳ ዓገንቲ ጎኔማ ዔርቱ ዋርቆንታ ኔኤኮ ቦርሳ ካሎ"ሞ ዓኣቻኒ ቦኦሪ ዓፒላንታ ታ ገዳ"ፓ ኔ ሻንቃንዳጉዲ፡ ዛጋኒያ ዓኣፖ ቲሽኮ ዴኤሾ ኔ ሻንቄ ቲሽካንዳጉዲ ታ ኔና ዞራኔ።

19 ታኣኒ ናሽካዘንሢ ቢያ፡ ሜቶ ዒንገ ጎራ"ኔ፤ ዩያር ዶይ፤ ጎሞዋ ኔኤኮ ቡኡ።

20 ሐይሾ፡ ታኣኒ ካራ" ዔቂ ማኦሪ ዓሲዮ፡ ገይ ዔኤሊ"ንታኔ፤ ያኦኒያ ታኣኮ ዑኡዞ ወይዚ ካር" ታኣም ቡሎ"ቲ ዒ ዛ ባንሢ ታ ጌሊ ዒ ዛና ዋላ" ሙኡዚ" ሙዓንዳኔ፤ ዒዚያ ታኣና ዋላ" ሙዓንዳኔ፤

3:12 የሐ. ያፕ. 21:2፤ ዒ.ሲ. 62:2፤ 65:15። 3:14 ሱኡጎ. ማ 8:22። 3:19 ኮኣኪ. 3:12፤ ዔ.ብ. 12:6።

21 ታኣኒ ያሎ ባሺ ታ ዓደና ዎላ" ታ ዓደኮ ካኣቱሞ ያይታ" ዴዔሢጉዲ፣ ያሎ ባሺሢያ ታኣና ዎላ" ታ ካኣቱሞ ያይቶይዳ ታ ዴይሣንዳኔ።

22 «ሺኢጲያ ማኣሮሞ ዓያና" ጋዓ ባኮ ዎይዛ ዎይዚ ዓኣሢ ዎይዘንጎ!» ጌዔኔ።

4

ጫሪንጮይዳ ያኦሲኮ ካኣቱሞ ያይቶና ዒኢካ ሸኢቁንታ ሸኢጲያ

1 ዩካፓ ጫሪንጮይዳ ቡሊ"ንቲ ዓኣ ካራ ታ ዴንቁኔ፤ ዩማና ዛዬ ዑኡሲጉዲ ኬኤዛ ቤርታኣ ዑኡዛሢ፡- «ሓኒ፣ ሃንጋ ኬሰኬ፤ ሓይፓ ሴካ፣ ቤርታ ማዓንዳ ባኣዚ" ታ ኔና ዳዎንዳኔ» ታኣሞ ጋዓዛ፣

2 ቤዘማና ታኣኒ ዓያና ጌኤሺ ማላሢዳ ጌሌኔ፤ ዓካሪ ዒማ"ና ጫሪንጮይዳ ካኣታ" ዴዓ ያይታ ጌሢንቲ ዓኣንቲ ታ ዴንቁኔ፤

3 ዩኖ ያይቶይዳ ዴዒ ዓኣሢኮ ዓውካራ ሚርጌ ሚዛጳ ዒያሰጲዴና ሴርዲኖኔ ጌይንታ ሹጮ ዑያ ማላያኬ፤ ካኣቱሞ ያይቶኮ ኮይላ" ሜሬጊዴ ጌይንታ ሹጮ ዑያ ማላ ሚዛጲ ዠኡሎ ዓኣኔ።

4 ዩያጉዲ ሃሣ ካኣቱሞ ያይቶ ኮይላ" ሜሌ" ለማታሚ" ያይዶ ካኣቱሞ ያይታ ዓኣኔ፤ ዩንሢ ያይቶንሢዳ ቦኦሬ ማኣያ ማይንቲያ ሃሣ ቶኣኮ"ይዳኣ ዎርቁፓ ኮሹ"ና ቦንቾሞ ዓጎ ባኮ ዓጌ ለማታሚ" ያይዶ ጋርቺ ዴዒ ዓኣኔ።

5 ካኣቱሞ ያይታሢዳፓ ዜኤሊንሢና ዑኡሲና ሃሣ ጉጉንሢያ ኬሰኬኔ፤ ሃሣ ዩያ ያይታሢኮ ቤርታ ፖዒ ፖዓ ላንካይ ያሞፔ ዓኣኔ፤ ዩያታ ላንካዎ ያኦሲ ዓያኖንሢኬ።

6 ሓሣ ዩያ ያይታ"ሢ ቤርታ ሌማሌኤሹጉዲ፣ ጌኤሽኪ ጴዳ ባዚ" ዓኣኔ።

ካኣቱሞ ያይቶ ኮይሎይዳ ያይዶ ዛላ" ሚርጌ ዓኣፒ ዓኣ ያይዶ ዲማ ዲማ ማዠንቲ ዓኣኔ።

7 ቤርታኣ ባካሢ ዘቢ" ማላያ፣ ለምዓሳሢ ጌማይ ማላያ፣ ሃይሣሳሢ ጊንሣ ዓሲ ዓኣፒ ካራ ማላ ዓውካራ ዓኣያኬ፤ ያይዳሳ፣ ጋፒንጻሢ ባራና ኮኣኬ ማላያኬ።

8 ዩንሢ ያይዶ ባኮንሢኮ ላሆ" ላሆ" ጋኣሲ ዓኣኔ፤ ዩያቶኮ ዙሎ"ና ጋርይይዳ ዲቢ ዓኣፒ ዓኣያኬ፤ ዩያታ ዎንቶና ሮኦርና፡- «ያኦሲሞ ዲማዴሢዮ! ዲማዴሢዮ! ዲማዴሢዮ!

4:3 ሂዚ. 1፡26-28፤ 10፡1። 4:5 ኬሲ. ማፃ 19፡16፤ ዮሐ. ያፔጳ 8፡5፤ 11፡19፤ 16፡18፤ ሂዚ. 1፡13፤ ዮሐ. ያፔጳ 1፡4፤ ዛካ. 4፡2። 4:7 ሂዚ. 1፡22፤ 1፡5-10፤ 10፡14።

ቢያ ባአዚ" ዳንዳዓ፥ ጎዳ ማዕ ያኦዛሂዮ!
 ሐሂ ዓአሂና ሚናፓአ ናንጋሂዮ
 ሐጊያ ሙካንዳሂዮ!»
 ጋዓኔ፤ ዬያ ዔያታ ሃሹ"ዋጋ ጋዓኔ።
 9 ዬንሂ ባኮንሂ ካአቱሞ ያይቶይዳ ዴዔሂም፥ ናንጊና
 ናንጋሂም፤ ቦንቾ፥ ሄርሺሂ፥ ጋላታአ ሺኢሻ ዋዶ"ና ቢያ፥
 10 ለማታሞ ያይዶ ጋርቾንሂ ናንጎና ናንጋሂም፥ ካአቱሞ
 ያይቶይዳ ዴዔሂም ጉሞዓቲ ዚጋኔ፤ ዔያቶኮ ቶኦካ" ዓጎ፥ ቦንቾ
 ባኮ ካአቱሞ ያይቶ ቤርታ ጌሂ፡-
 11 «ኑ ጎዳ ማዕ ኑ ያኦዛሂዮ!
 ቢያ ባአዚ" ኔ ማኸሂሂር
 ቢያ ባካ ማኸንቴሂና ማዕሂ፥
 ኔ ማሊያና ማዕሂሂር
 ቦንቾና ሄርሺሂና ዋልቄያ ኔኤም ኮይሳያኬ»
 ዔያታ ጋዓኔ።

5

ማሪንቴ ማፃአፖና ማራዓሂና ዘላ

1 ካአቱሞ ያይቶይዳ ዴዔሂኮ ሚዛቆ ኩጫ፥ ጋርና ዙሎ"ናይዳ
 ቢያ ፃአፒንቴያ ሃሂ ለንካይ ዔርዛ ማላታ ዑፃ ያኦኒያ ቡሉ"ዋጉዲ
 ዓይሦና ማሪንቴ ማፃአፔ ታ ዛጌኔ፤

2 ፔቴ" ዴኤፒ፥ ኪኢታንቾሰኬይ ዴ"ጊ ጌዔ ዑኡሲና፡- «ዬንሂ
 ዔርዛ ማላቶንሂ ቡላ"ኒና ማፃአፖዋ ቡላ"ኒ ዳንዳዓሂ ያናዳይ?»
 ጋዓንቴ ታ ዛጌኔ።

3 ጋዓንቴ ጫሪንጮይዳ ሳይይዳ ሃሂ ሳይኮዋ ዴማ" ማፃአፖ
 ቡላ" ጋርይዳ ዓአ ባኮ ዛጋኒ ዳንዳዓ ዓሲ ያኦኒያ ባአያ ማዕኔ፤

4 ማፃአፓሂ ቡላ" ጋር ዛጋኒ ዳንዳዓ ዓሲ ዴዲባአያ ማዕሂ ታ
 ዴንቄ ዋዶ"ና ሚርጌና ዬኤኮኔ፤

5 ዬማና ጋርቾንሂዳፓ ፔቴ"ይ፡- «ዬኤኪፓ፤ ሐአዛጌ፥ ዪሁዳ
 ማአራፓ ማዕ፥ ዘባ"ሂ፥ ዳውቴ ፃጳሂ ያሎና ባሺያ ማዕሂሂር ዒዚ
 ማፃአፓሂና ለንካዋ «ቡሎ"ፓ» ጌይንቴ ማላቶንሂ ቡላ"ኒ
 ዳንዳዓያኬ» ታአም ጌዔኔ።

6 ዬካፓ ካአቱሞ ያይቶና ያይዶ ባኮንሂናኮ ሐሂ ጨሞንሂኮዋ
 ባአካ" ዋዶናያ ማላ ማራይ ዔቂ ዓአንቴ ታ ዛጌኔ፤ ዬያ ማራዓሂኮ

4:8 ሂዚ. 1፥18፤ 10፥12፤ ዒሲ. 6፥2-3። 5:1 ሂዚ. 2፥9-10፤ ዒሲ. 29፥11።
 5:5 ማኸ. ማፃ 49፥9፤ ዒሲ. 11፥1፤ 10።

ላንካይ ጉራኒና ላንካይ ዓኣፒና ዓኣኔ፤ ዬያታ ዓጮ" ቢያ ዳኪንቴ ላንካዎ ያሕሲ ዓያኖንሢኬ።

7 ማራዓሢ ሙኪ ካኣቱሞ ያይቶይዳ ዴዔሢኮ ሚዛቆ ኩጫ ዓኣ፤ ማፃኣፓሢ ዔኬኔ፤

8 ዓ.ዚ ማፃኣፓ ዔካማና ያይዶ ባኩንሢንታ ላማታሞ ያይዶ ጪሞንሢንታ ማራዓሢኮ ቤርታ ጉሞዓቲ፤ ባሊቶና ሂርኪ ጌዒ ዘገኔ፤ ዬያታ ፔቴ" ፔቴ"ሢ ኩጮይዳ ጎኦላ" ዔኪ ሃሣ ያሕሲም ዲማዳ ዓሶኮ ሺኢጲያ ማዔ ዑንጅ ዓርቄያ ዎርቄና ኮሾ"ና ዔቴ ማዔ ዳካ" ሳኣኔ ዔኪ ዓኣኔ።

9 ዔያታ ቤርታ ጌይንቲ ቤቁባኣ ያሕሲ ቦንቾሞ ማዓ ዓይኑሞ፡- «ማፃኣፓሢ ዔካኒና

<ቡሎ"ፖ> ጌይንቲ ማላቶንሢያ ቡላ"ኒ ኔ ዳንዳዓያ ማዔኔ፤

ዎይቲ ጌዔቴ ኔኤኒ ዎዲንቴኔ፤

ኔኤኮ ሱጉያና ዲማ ዲማ ቶኦካ"ፓ ዲማ ሙኡቾ ጌሰታ ዓሶፓ፤ ዜርፃፓ ሐሣ ዓሲ ቢያ ባኣካ"ፓ ዲማሲ ዓሶ ያሕሲም ኔ ጊንሣ ማሂ ሻንቄኔ፤

10 ኑ ያኣዛሢማኣ ቄኤሴ ማዒ ዔያታ ማዳንዳጉዲ ኔ ማሄኔ፤ ሳያይዳኣ ዔያታ ካኣታዳንዳኔ»

ጌዒ ጌዒ ዓይናዳ።

11 ዬካፓ ሃሣ ታ ዛጋያ ካኣቱሞ ያይቶና ያይዶ ባኩንሢና ጪሞንሢናኮ ኮይላ" ሚርጌ ኪኢታንቾኮ ዑኡሲ ታ ዎይዜኔ፤ ዬያቶኮ ሚርጌማ ሚርጌ ሺያፓ ዑሣ ሃሣ ፓይዲንታኒያ ዳንዳዒንቱዎያኬ፤

12 ዬያታ ዴኤፒ ዑኡሲና፡- «ዎዲንቲ ማራዓሢም ዎልቄ፥ ቆሎ

ዔራቶ፥ ዲዲሞ፥ ቦንቾንታ ሂርሺሢንታ ጋላታንታ ኮይሳያኬ» ጌይ ዓይናዳ።

13 ዬካፓ ጫሪንጮና ሳያናይዳ፥ ሳያኮዎ ዴማ" ሐሣ ዴኤፖ ባዘ"ናይዳ፥ ዬያ ባኮ ቢያይዳ ዓኣ ማዢንታ ቢያ፡-

«ካኣቱሞ ያይቶይዳ ዴዔሢና ማራዓሢናም ጋላታ፥ ቦንቾ፥ ሂርሺሢንታ ዎልቄንታ

ናንገና ማዖንጎ» ጌይ ዓይናዳንቴ ታ ዋይዜኔ።

14 ያይዶ ባኮንሢያ «ዓኣሜን» ጌዔኔ፤ ጋርቸንሢ ጊንሣ ባለቶ ሳዖ ባንሢ ሂርኪዲ ጉምዓቲ ዚጌኔ።

6

«ቡሎ"ፖ» ጌይ ዓይሦና ዔርዛ ማላቶንሢኮ ቡሎ"ንቴዖ

1 ዩካፓ ማራዓሢ ለንካዎ «ቡሎ"ፖ» ጌይ ዓይሦና ዔርዛ ማላቶንሢያ፣ ጌርታሳዞ ቡሎ"ንቴ ታ ዛጌኔ፤ ዒማ"ና ያይዶ ባኮንሢያ፣ ፔቴ"ሢ ጉጉንሢጉዴ ዑኡሲና «ሐኒ ዩዔ!» ጋዓንቴ ታ ዋይዜኔ።

2 ዒማ"ና ቦኦሬ ፓር ታ ዴንቄኔ፤ ዩያ ፓራሢ ዓኣዛ ዓርቄ ዓሲ ቶጊ ዓኣኔ፤ ዒዛም ቦንቸር ቶኦካ" ዓጎ ባካ ዒንጊንቴኔ፤ ዒዚያ ያሎና ባሻያ ማዒ ባሺ ባሺ ዓኣዳኒ ከሰከኔ።

3 ማራዓሢ ለምዓሳ ዔርዛ ማላቶ ቡሎ" ዎዶ"ና ለምዓሳ ባካሢ «ሐኒ ዩዔ!» ጋዓንቴ ታ ዋይዜኔ።

4 ሐሣ ማሎ" ሱጉሢጉዲ ዞቄ ፓራ ከሰከኔ፤ ዩያ ቶጌሢም ሳዖይዳ ኮሽ ናንጊ ባይዘንዳጉዲና ዓሲ ዎሊ ዎዶንዳጉዲ ማሃንዳ ቢታንቶ ዒንጊንቴኔ፤ ዴኤፒ ጩንቻ ዓፓርዎ ዒዛም ዒንጊንቴኔ።

5 ማራዓሢ ሃይሣሳ ዔርዛ ማላቶ ቡሎ" ዎዶ"ና ሃይሣሳ ባካሢ «ሐኒ ዩዔ!» ጋዓንቴ ታ ዋይዜኔ፤ ዒማ"ና ታ ሃሣ ካርሢ ፓር ዴንቄኔ፤ ዩያ ፓራሢ ቶጌሢ ኩጫ ዴኤሡም ዔርዛ ባኣዚ" ዔኪ ዓኣኔ።

6 ዩካፓ ያይዶ ባኮንሢ ባኣካ"ፓ ዑኡሲጉዴ ባኣዚ" ታኣም ዋይዚንቴያ ማሌኔ፤ ዩና ዑኡዛ «ዛላ ኪሎ ማዓ ዛርጌ ፔቴ" ኬሊ" ማዶና ማዶ" ዛላ ዒንጊንታያ፣ ፔቴ" ኪሎና ዛላና ማዓ ዔልዓ ዩኖ ጎይዖ ፔቴ" ኬሊ" ማዶ ማዶም ዒንጊንታያ ማዖም፤ ዛይቶና ዎይናፓ ኮሾ"ና ዑጉና ጋዓንቴ ፑርቲሲ፣ ባይዚፖ» ጋዓንቴ ታ ዋይዜኔ።

7 ማራዓሢ ያይዳሳ ዔርዛ ማላቶ ቡሎ" ዎዶ"ና ያይዳሳ ባካሢ «ሐኒ ዩዔ!» ጋዓንቴ ታ ዋይዜኔ፤

8 ዩማና ጋላፒ ፓር ታ ዴንቄኔ፤ ዩያ ቶጊ ዓኣ፣ ዓሢኮ ሱንፃ ሐይቢ ጌይንታያኮ፤ ዒዛኮ ጊንፖ ዓርቄ ሐይቄ ዓሳ ኬዳ" ቤዛ ሙኪ ሙኪ ዓኣኔ፤ ዔያቶም ሳዖኮ ዛሎ"ኮ ዛሎ" ያልዚና፣ ናይዚና፣ ፑርታ ዶርዖና ሃሣ ካይዚ ቦዖና ዎዲሺ ባይዘንዳጉዲ ቢታንቶ ዒንጊንቴኔ።

9 ደንጋሳ ዔርዛ ማላቶ ዒ ቡሌ" ዎድ"ና የኦሲ ቃኦሎ"ና ዔያታ ማርካጳ ማርካቶ ዛሎ"ናሮ ጌይ ዎድና ዓሶኮ ሽምጋሂ የኦሲም ዒንገ ካኦሽኮ ቤዘኮ ዴማ" ዓኣንቴ ታ ዴንቄኔ፤

10 ዔያታ ዴ'ጊ ጌዔ ዑኡሲና:- «ዲማዴያ ሃሃ ጎኔ ማዔያ፡ ቢያሂኮ ዑፃ ማዔ ጎዳሂየ! ሳይደ ዓኣ ዓሶደ ዔ ዎጉዎኣሂና ኑ ሱጉያ ዛሎ"ዎ ኮሞ ኔ ዔኩዎኣሂ ዎማ ሄላ"ንዳኣናደይ!» ጌዒ ጌዒ ዒላታኔ።

11 ዴካፓ ፔቴ" ፔቴ"ዘንሂም ቦኦሬ ማኣዓ ዒንገንጎቴኔ፤ ሃጊ ዔያቶጉዲ ዎድንደ፡ የኦሲም ማዴያ ማዔ፡ ዔያቶኮ ላጎ ሃሃ ዒሸንሂ ማዔ ዘንሂኮ ፓይደ" ኩማንዳያ ሄላ"ንዳኣና ዳካ" ዔያታ ጊቢ" ዳንደዒ ዴዓንደጉዲ ዔያቶም ኬኤዘንጎቴኔ።

12 ዴካፓ ማራዓሂ ላሃ"ሳ ዔርዛ ማላቶ ቡላ"ንቴ ታ ዛጌኔ፤ ዴማና ሳዓ ማርጌና ዓገጃኔ፤ ዓባ" ካርሂ ዓፒላጉዲ ካርታዛ ዓገና ጉቤና ሱጉሂጉዲ ዘቄኔ፤

13 ዴኤፒ ዠባሬ ቤሌሴ ማያ ዓገሃ ዎድ"ና ካዲባኣ ዓኣፓ ማፃፓ ዲኢናሂጉዲ ጨሪንጮ ዠኦጋሂያ ዲኢኔ።

14 ጨሪንጮ፡ ማሪንጎቴ ማፃኣፓጉዲ ማዒ፡ ማርቲ ዴንዴኔ፤ ሃሃ ዲኩ"ንታ ዎኣያ ሳዛ" ዓኣ ዓጮ" ዓኣ ቤዛፓ ሸኢኪ ባይቄ።

15 ዓጮ"ኮ ዲማ ዲማ ካኣታ"፡ ዎይሃ ዓሳ፡ ፖኦሊሶ ዓይሃ ዓሳ፡ ዎርጎጮ ዓሳ፡ ደደ ዓሳ፡ ዴማ" ማዒ ማዳ ዓሶንታ ማዲሻ ዓሶንታ ቢያ ዴኖ ባኣካ" ዓኣ ዔቶና ዲኩ"ና ሃሃ ላሎ ቆኦፖናይዳ ዓኣሽንጎቴኔ፤

16 ዴካፓ ዲኩ"ና ላሎናም:- «ኑ ዑይይዳ ደዑዎቴ! ካኣቴም ዎይቶይዳ ዴዔሂና ማራዓሂናኮ ጎሪ"ንታፓ ኑና ዓኣቹዎቴ!

17 ዓይጎሮ ጌዔቴ ዴኤፖ ዔያቶኮ ጎሪ"ንቶ ኬላ" ሙኬሂሮ ዎኣኒ ዴያኮ ቤርታ ዔቃኒ ዳንደዓንደይ?» ጌዔ።

7

144000 ዒሰራዔኤሌ ዓሶ

1 ዴካፓ ዎይደ ኪኢታንቻ ዓጮ"ኮ ዎይደ ዛሎ"ና ዔቂ ዓኣንጎቴ ታ ዴንቄኔ፤ ዔያታ ሳይደ ማም ባዘ"ይዳ ሃሃ ማይይዳ ዓይጎ

6:12 የሓ. የፔዳ 11፣13፤ 16፣18፤ ዒሲ. 13፣10፤ ዒዲ. 2፣10፤ 3፣15፤ ማቴ. 24፣29፤ ማር. 13፣24-25፤ ሉቃ. 21፣25። 6:13 ዒሲ. 34፣4። 6:14 የሓ. የፔዳ 16፣20። 6:15 ዒሲ. 2፣19-21። 6:16 ሆሴ. 10፣8፤ ሉቃ. 23፣30። 6:17 ዒዲ. 2፣11፤ ማሏ. 3፣2።

ዠባሬያ ዠባርሹዋጉዲ ዓጮ"ኮ ያይዶ ዛላ"ፓ ሙካ ዠባር ቢያ ለኣገ ሳርቄ።

2 ሐሣ ገንሣ ናንገና ናንጋ ያኣዛሂኮ ዔርዛ ማላቶ ኩጫ ዔኬ፥ ማለ" ያኦሲ ከኢታንቻ ዓባ" ከሰካ ዛላ"ፓ ሙካንቴ ታ ዴንቄ፤ ዒዚያ ሳዖና ባዞ"ና ባይዛንዳጉዲ ቢታንታ ዒንገንቴ ያይዶ ከኢታንቻንሢም ዴኤፒ ዑኡሲና፡-

3 «ኑ ያኣዛሂም ማዳ ዓሶኮ ባሊቶይዳ ዲማሲ ዔርዛ ማላቶ ኑ ዓይሣንዳያ ሄላ"ንዳኣና ሳዖ ማዔቴያ ባዞ"፤ ሃሣ ማዖዎ ዔኤቢ ዋኦቲፖፕቴ» ገዔ።

4 ዔርዛ ማላቶ ዓይሣንቴ ዓሶኮ ፓይዶ" ታ ዋይዜ፤ ዬያታ ዒሰራዔኤሌ ፃጶ ቢያይዳፓ ማዔያ ጸኤታና ያይዲታሚ" ያይዶ ሺያ ዓሲኬ።

5-8 ዪሁዳ ፃጶ፣ ርኑቤኤሌ ፃጶ፣ ጋኣዴ ፃጶ፣ ዓሴኤሬ ፃጶ፣ ኒፕታኣሌኤሜ ፃጶ፣ ሚናኣሴ ፃጶ፣ ሲሞኦኔ ፃጶ፣ ሌዊ ፃጶ፣ ዪሳኮኦሬ ፃጶ፣ ዛብሎኦኔ ፃጶ፣ ዮሴፔና ቢኢኒያሜና ፃጶ፣ ዬያ ፔቴ" ፔቴ"ሢ ፃጶ፣ ታጶ ላሞዖ ሺያ፣ ሺያ ዓሲም ማላታ ዓይሣንቴ።

ቦኦሬ ማኣዖ ማይንቴ ሚርጌ ዴሬ

9 ዬካፓ ያኦኒያ ፓይዳኒ ዳንዳዑዋ፥ ሚርጌ ዓሲ ታ ዴንቄ፤ ዬያታ ዲማ ዲማ ዴሬይዳ፣ ቶኦኪዳ፣ ዜርሢዳ፣ ሙኡቺ ጌሰታ ዓሲዳ፣ ቡኬ ዓሲኬ፤ ዔያታ ቦኦሬ ማኣዖ ማይንቴ፥ ሚኤፃ ዒላሺያ ፔ ኩጫ ዓርቂ ካኦቲሞ ያይቶና ማራዓሢና ቤርታ ዔቃዖ፥

10 ዴኤፒ ዑኡሲና፡-

«ዳቂንታ ኑም ጴዳሢ ካኦቲሞ ያይቶይዳ ዴዔ፥ ኑ ያኣዛሢና ማራዓሢናይዳ፣ኬ» ጌዒ ጌዒ ዒላታ።

11 ከኢታንቻ ቢያ ሃሣ ካኦቲሞ ያይቶና ጋርቻንሢና ሃሣ ያይዶ ባኮንሢኮ ዓጫ ዔቄ፥ ካኦቲሞ ያይቶ ቤርታ ባሊቶና ሂርኪ ጌዒ ያኦሲም ዚጋዖ፥

12 ሂዚ ጌዔ፡-

«ዓኣሜን፤ ሄርሺሢና ቦንቻና ዔራቶና፥ ጋላታና ዴኤፒሲሢና ዋልቄና ደዲሞና፥ ኑ ያኣዛሢም ናንገና ማዖንጎ፤ ዓኣሜን።»

13 ዬማና ጋርቻንሢዳ፣ ፔቴ" ታ ባንሢ ሺራዖ፡- «ሓንሢ ቦኦሬ ማኣዓሢ ማይንቴዞንሢ ዖናንሢዳይ? ዓንካፓ ዔያታ ሙኬይ?» ጌዒ ታና ያኦጮ።

14 ታክኒያ ማሃዎ፡- «ጎዳሂዮ! ኔ ዔራኔ» ጋዓዛ፣ ዒዚ «ሐንሂ ጳጳሪ ማታሂ ጊደና ከሰኪ ሙኩዞንሂኬ፤ ዔያታ ፔኤኮ ማአዓሂያ ማራዓሂ ሱጉዎና ማሰኪ ቦኦሪሸኔ፤

15 ዬያሮ ያኦሲ ካአቱሞ ያይቶ ቤርታ ዋንቴና ሮኦሪና ጌኤኮ ማአሮይዳ ዒዛሞ ማጳኔ፤ ካአቱሞ ያይቶይዳ ዳዔሂ ዔያቶ ባአካ" ማዒ ዔያቶኮ ሸባ"ሂ ማዓንዳኔ።

16 ሐካፓ ሴካ ዔያታ ናይጳንታዓኬ፤ ጳኤቢያ ጳኤቢንታዓኬ፤ ዓቢ ዔያቶ ሚቻዓኬ፤ ሩኡጲያ ዔያቶ ሄላ"ዓኬ፤

17 ዓይጎሮ ጌዔቴ ካአቱሞ ያይቶ ባአካ" ዓአ ማራዓሂ ዔያቶኮ ሄንቃሂ ማዓንዳኔ፤ ናንጎ ዓልቃ ዋአፆ ባንሂያ ዔያቶ ዒ ዔኪ ዓአጳንዳኔ፤ ያኦሲ ዔያቶኮ ዓቢያ ዓአፓፓ ቢያ ዑጫንዳኔ» ታአሞ ጌዔኔ።

8

ቡሊንቶፓ ጌይ ዓይሆና ለንካሳዘኮ ቡሊንቴዎ

1 ማራዓሂ ቡሊንቶፓ ጌይ ዓይሆና ለንካሳ፣ ባኤሎ ቡሎ" ዎዶ"ና ጫሪንጫ ዎይዘንታ ባአዚ" ባአያ ማዒ፣ ጳካ" ዚቲዮ ጌዔኔ፤

2 ዬካፓ ያኦሲ ቤርታ ዔቃ፣ ለንካዎ ኪኢታንቸ ታ ዳንቄኔ፤ ዔያቶሞ ዒማ"ና ለንካይ ዛዬ ዒንጊንቴኔ።

3 ዑንጅ ጩቢሶያ ዎርቄና ኮሺ"ንቴ ሱሂ ኩንዔ ኩጫ ዔኬ፣ ኪኢታንቸ ሙካዎ ያኦሲሞ ዒንጎ ባካ ዒንጊንታ ቤዞ ኮይላ" ዔቃዛ ካአቱሞ ያይቶ ቤርታ ዓአ፣ ዎርቆና ኮሺ"ንቴ ያኦሲሞ ዒንጎ ባኮ ዒንጎ ቤዛ፣ ያኦሲሞ ዳማጳ ዓሶኮ ሸኢጲያና ዎላ" ያኦሲ ቤርቶ ሸኢሻንዳጉዲ ማርጌ ዑንጅ ዒዛሞ ዒንጊንቴኔ።

4 ዑንጅኮ ጩባ" ያኦሲሞ ዳማጳ ዓሶኮ ሸኢጲያና ዎላ" ኪኢታንቸሂ ኩጫፓ ያኦሲ ቤርቶ ከሰኬኔ።

5 ዬካፓ ኪኢታንቸሂ ጩቢሶ፣ ሱዎ ኩንዎ ዔኪ ያኦሲሞ ዒንጎ ባኮ ዒንጎ ቤዛፓ ታሚ ካአሺ ሱዎ ኩንዎይዳ ኩንሂሰካፓ ሳዎ ባንሂ ከኤራዛ ጉጉንሂና ጳኤፒ ዑኡሲና ሐሂ ዜኤሊንሂያ ዜኤሊንሂም ሳዎ ዓገጽ።

ኪኢታንቸ ዛያሂ ዎርቄሂ

7:14 ዳአኔ. 12፣1፤ ማቴ. 24፣21፤ ማር. 13፣19። 7:16 ዒሲ. 49፣10። 7:17 ዓይኑ. 23፣1፤ ሂዚ. 34፣23፤ ዓይኑ. 23፣2፤ ዒሲ. 49፣10፤ 25፣8። 8:3 ዓሞ. 9፣1፤ ኬሲ. ማፃ 30፣1፤ 3። 8:5 ለዊ. ዓኬ 16፣12፤ ሂዚ. 10፣2፤ ኬሲ. ማፃ 19፣16፤ የሐ. ያፕጳ 11፣19፤ 16፣18።

6 ይካገ ለንካይ ዛዬ ኩጫ ዔኬ፥ ለንካይ ኪኢታንቸሰከንህ
ዛያህ ዋርቃኒ ጊኢጊንቴ።

7 ቤርታሳ ኪኢታንቸህ ዛያህ ዋርቃዛ፥ ሱጉህ ሲኢሪንቴ ሻቸና
ታሚና ሳዓ ኬዴ"፤ ይማና ዛላኮ ዛላ ጊንህ ማዓ ሳዓ ሚጩ፤
ሚያንታ ዓኣዔ ማኣቶንታኮ ዋ ዛላኮ ዛላ ማዓይ ቢያ ሚጩ።

8 ሃሃ ለምዓሳ ኪኢታንቸህ ዛያህ ዋርቃዛ ታሚ ዔኤታ፥ ዴኤፒ
ዲካ ማላ ባኣዚ" ባዞ"ይዳ ኬዳ"ዛ ዛላኮ ዛላ ጊንህ ማዓይ ቢያ
ባዞ"ኮ ሱጉህ ማዓይ፤

9 ባዞ"ይዳ ናንጋ፥ ሹምጋ ዓኣ ባኮኮ ዛላኮ ዛላ ማዓይ ቢያ
ሐይቄ፤ ሃሃ ዋኣፆ ካኣሚሎኮ ዋ ዛላኮ ዛላ ጊንህ ማዓይ ቢያ
ፑርቲ ጋፔ።

10 ሃይሃሳ ኪኢታንቸህ ዛያህ ዋርቃዛ ያምፔጉዲ ዔኤታ
ዴኤፒ ዠኦኔ ጫሪንጫጋ ዋር ዋኣፆና ዓልቃ ዋኣፆናኮ ዛላኮ ዛላ
ማዓ ጊንፆይዳ ኬዴ"።

11 ይያ ዠኦጋሂኮ ሱ"ንፆ «ዋላንጋ» ጌይንታያኬ፤ ይያር ዋኣፆኮ
ዛላኮ ዛላ ጊንህ ማዓይ ቢያ ጫንቸ ማዓይ፤ ዋኣፆኮ ጫንቄይዳጋ
ዔቄያና ሚርጌ ዓሲ ሐይቄ።

12 ያይዳሳ ኪኢታንቸህ ዛያህ ዋርቃዛ ዓቦ"ንታ ዓጊኖንታ
ዠኦጋሂንታኮ ዛላኮ ዛላ ጊንህ ማዓይ ቢያ ዲይንቴ፤ ሮኦርንታ
ዒባኖንታኮ ዛላኮ ዛላ ማዓ ጊንፆይዳ ፖዒ ፖዑፊ ዓላጊንቴ።

13 ይካገ ሃሃ ፔቴ" ኮኦኬ ጫሪንጫ ባራናንቴ ታ ዴንቄ፤ ይይ
ዴኤፒ ዑኡሲና፡- «ዓቴ" ሐይሃ ኪኢታንቸህ ዛያህ ዋርቃዛ
ዋይዚንታንዳ ዑኡዞ ዛሎ"ና ሳይይዳ ናንጋ ዓሶም ባዴዔ! ባዴዔ!
ባዴዔ!» ጋዓንቴ ታ ዋይዜ።

9

1 ደንጋሳ ኪኢታንቸህ ዛያህ ዋርቃዛ፥ ዒማ"ና ጫሪንጫጋ ሳዓ
ኬዴ" ፔቴ" ዠኦኔ ታ ዴንቄ፤ ይያ ዠኦጋሂም ዴኤፒ፥ ዒጊቻ ዔቶ
* ቡሎ" ቁልፔ ዒንጊንቴ።

2 ዒዚ ዔቶ ቡሎ" ዎድ"ና ዓንህ ታሚጋ ኬሰካ፥ ጩቢጉዴ
ጩቢ ዔታጋ ኬሰኬ፤ ይይ ዔታጋ ኬሰካ ጩባ" ዓቦ"ንታ
ጫሪንጫንታ ቢያ ዲሚሼ፤

8:7 ኬሲ. ማፆ 9፥23-25፤ ሂዚ. 38፥22። 8:10 ዒሲ. 14፥12። 8:11 ዔር.
9፥15። 8:12 ዒሲ. 13፥10፤ ሂዚ. 32፥7፤ ዒዪ. 2፥10፤ 3፥15። * 9:1 ዴኤፒ፥
ዒጊቻ ዔቶ፡- ጌይፆ ሳይኮ ዴማ" ፆላሆ ዓያና" ጋፒንፆ ዎሳ ኬሎ" ሄላ"ንዳኣና ዴዒ ዓኣ
ቤዞ። 9:2 ማዠ. ማፆ 19፥28።

3 ዬያ ጩቦ" ባኣካ"ፓ ዓቢሢ ሳይደዳ ኬዳ"ኔ፤ ዬያቶም ሳይደዳ ዓኣ ኮርናሢም ዲንጊንቴ ዋልቆጉዳ ዋልቁ ዲንጊንቴኔ፤

4 ሳይደዳ ዓኣ ማኣቶ"ንታ ዋርቁ ዓኣ ዲላሺንታ ሃሃ ዲማ ዲማ ሚያ ዔያታ ካኣሙዋጉዲ ዔያቶም ኬኤዚንቴኔ፤ ጋዓንቴ ዔያታ ሚታሳንዳጉዲ ጌይንቴሢ ሳሊቶይዳ ያኦሲር ማዒያ ዔርዘ ማላታባኣ ዓሶኬ።

5 ዬያቶ ደንጎ ዓጊኒ ሌሊ ሚታሳንዳጉዲ ማዓንዳኣፓዓቴም ዋዳንዳጉዲ ዋልቁ ዲንጊቦኦኬ፤ ዔያታ ሚታሳንዳ ጎይፃ ኮርና ዓሲ ዳዓዖ ሚታሳሢ ጎይፃ ሚታሳንዳጉዲኬ።

6 ዬንሢ ኬሎ"ንሢዳ ዬና ዓሳ ሓይቃኒ ኮዓንዳኔ፤ ጋዓንቴ ዔያቶም ማዓዓኬ፤ ሓይቢ ዔያታ ሱኡካዳንዳኔ፤ ጋዓንቴ ሓይቢ ዔያቶ ኮይላ"ፓ ዳንዲ ባይቃንዳኔ።

7 ዓቢያ ያልዘም ጊኣጌ ፓር ማላኔ፤ ዔያቶኮ ቶኦኮ"ይዳ ዓሳያ፣ ዋርቁና ኮሺ"ንቴ ቦንቸር ዓሳ ባካ ዓኣኔ፤ ዓኣፕ ካራ" ዔያቶኮ ዓሲር ማላያኬ፤

8 ዔያቶኮ ቶኦኮ" ጋፓና ላኣሊር ማላኔ፤ ዓጫ ዔያቶኮ ዘቢ" ዓቺ ማላያኬ፤

9 ዓንጊና ኮሺ"ንታ ያሎ ማኣዓሢ ማላ፣ ማኣዓ ዔያቶኮ ዓኣኔ፤ ዔያቶ ጋኣዘኮ ዑኡዛ ያልዘር ዓኣዳ ሚርጌ ፓርና ሳርጌላ ያይታናኮ ካኣኒ ማላያኬ።

10 ኮርናጉዲ ዑንኪና ዳዓ፣ ቤልሢ ዔያቶኮ ዓኣኔ፤ ዓሶ ዔያታ ደንጎ ዓጊኒ ሚታሳንዳ ዋልቃ ዔያቶኮ ዑንኮይዳ ዓኣኔ።

11 ዔያቶ ዋይሃ ካኣቲ ዔያቶኮ ዓኣኔ፤ ዲዚ ዴኤፖ፣ ዲጊቻ ዔያቶኮ ኪኢታንቻሢኬ፤ ሱንፃ ዲዘኮ ዔብሬ ዓሶ ሙኡጮና «ዓብዳኔ»፣ ጊሪኬ ዓሶ ሙኡጮና «ዓጲሎኔ» ጌይንታኔ፤ ዬና ጌይፃ «ባይዛ» ጌይሢኬ።

12 ቤርታሳ ሜቶ" ዋዳ" ጋፔኔ፤ ዓካሪ ሃሃ ሜሌ" ለምፃ ሜቶ ዋዳ ሙካንዳኔ።

13 ላሃ"ሳ ኪኢታንቻሢ ዛያሢ ዋርቃዛ፣ ያኦሲ ቤርታ ዓኣ ዋርቆና ኮሺ"ንቴ ያኦሲም ዲንጎ ቤዘኮ ያይዶ ዛላ" ዓኣ፣ ጉራኖ ማላ ባካፓ ዑኡሲ ኬሰካንቴ ታ ዋይዜኔ፤

14 ዬና ዑኡዛ ዛያሢ ዔኪ ዓኣ፣ ላሃ"ሳ ኪኢታንቻሢም፦ «ዴኤፖ ዔፕራዲሴ ዋርይዳ ቱኡቴ፣ ያይዶ ኪኢታንቻንሢ ቡሌ"!» ጌዔኔ።

9:3 ኬሲ. ማፃ 10፣12-15። 9:4 ሃዚ. 9፣4። 9:6 ዲዮ. 3፣21፤ ዔር. 8፣3።
9:7 ዲዩ. 2፣4። 9:8 ዲዩ. 1፣16። 9:9 ዲዩ. 2፣5። 9:13 ኬሲ. ማፃ
30፣1-3።

15 ዬኖ ኬሎ"ና፣ ዬኖ ዎዶ"ና፣ ዬኖ ዓጊኖና፣ ዬኖ ሌዎናም ገእጊንቴ ያይዶ ከኢታንቸንሢ ዓሶይዳፓ ዛላኮ ዛላ ማዓ ዓሲ ዎዳንዳጉዲ ቱኡዛፓ ቡሊ "ንቴኔ።

16 ፓራሢና ያላ ዓሶኮ ሚርጉማ ዲቢ ሺያና ፓይዲንታያ ኮሺ" ዲቢታሢ ፓይዶ" ታ ዔያቶኮ ዎይዜኔ።

17 ፓራሢና ፓራሢ ቶጊ ዓኣ ዓሶና ያኦሲ ታና ዳዌም ታኣኒ ዛጋንቴ ያዲኬ፡- ዳዳ ዔያቶኮ ያሎሮ ዔያታ ማኣዔ ባካ ታሚጉዲ ዘቄ ሃሣ ጮልዔ ጊንሣ ጨኢጨኮ ቡኒጉዲ ጋላፒኬ፤ ፓሮንሢኮ ቶኦካ" ዘቢ" ቶኦኪ ማላያ፣ ዔያቶኮ ዳንጋፓ ታሚና ጨቢና ዓንሢ ያኢሊ"ጉዳ ያኢሊ"ያ ኬሰካኔ፤

18 ዔያቶኮ ዳንጋፓ ኬሰኪ «ባይዘም» ጎዎና ባኮና ጌይፀ፡- ታሞና ጨቦና ሃሣ ያኢሎ"ና ዓሶኮ ዛላኮ ዛላ ጊንሢ ማዓያ ቢያ ዎዳኔ።

19 ፓሮንሢኮ ዎልቃ ዔያቶኮ ዳንጎና ዑንኮናይዳኬ፤ ዑንካ ዔያቶኮ ሸኦሺ ማላኔ፤ ሃሣ ሸኦሺ ቶኦኪጉዳ ቶኦኪ ዔያቶኮ ዓኣኔ፤ ዓሶ ዔያታ ሜታሲ ዎዳሢ ዬያናኬ።

20 ዬንሢ «ባይዘም» ጌይንቴ ባኮንሢ ዎዳዎንቴ ዓቴ" ዓሳ ፔኤኮ ማዳ ፑርቶ ማዶ" ቡኡዲ ሃሺ"ባኣሴ፤ ዬይያ፡- ያላሄንታ ዎርቄይዳፓ፣ ቢራ ዓንጊዳፓ፣ ሞኦኖ ዓንጋፓ፣ ሹቸፓ ሃሣ ሚሢፓ ኮሺ"ንቴያ፣ ዛጋኒያ ዎይዛኒያ፤ ሃሣ ዓጊዲ ሃንታኒያ ዳንዳዑዎ ካኣሽኮ ባኮንታ ዔያታ ካኣሽኪያ ሓሺ"ባኣሴ ጌይሢኬ።

21 ዬያጉዲ ሃሣ ሹምፖ ዎዲሢ፣ ማርሻ ማርሺሢ፣ ማቾ ሃሣ ዓኒ ማዒባኣያና ላሂሢ፣ ዉሱሞ፤ ዬያ ባኮ ዔያታ ቡኡዲ ሓሺ"ባኣሴ ጌይሢኬ።

10

ከኢታንቸሢና ዳኮ" ማሪንቴ ማፃኣፔሎና

1 ዬካፓ ሃሣ ሻኣሬ ማይንቴያ፣ ሜሌ" ዳኤፒ ከኢታንቸ ጫሪንጫፓ ኬዳ"ንቴ ታ ዳንቄኔ፤ ዒዛኮ ቶኦኮ" ዓጮ ሺሬ፣ ዠኡሎ ዓኣኔ፤ ዬያኮ ዓኣፖ ካራ" ዓቢጉዳያ፣ ቶካ ዒዛኮ ሃሣ ቱርቱሪጉዲ ዔቄ ታሚ ማላያኬ፤

2 ዒዚ ኩጮይዳ ዳካ" ቡሊ"ንቲ ዓኣ፣ ማሪንቴ ማፃኣፔ ዔኪ ዓኣኔ፤ ዒማ"ና ዒ ሚዛቆ ቶኮና ባዘ"ይዳ፣ ሻውሎ ቶኮና ሳይይዳ ሄ'ርቄ ዔቄ ዓኣኔ፤

9:20 ዓይኑ. 115፣4-7፤ 135፣15-17፤ ዳኣኔ. 5፣23።

3 ሐሣ ዒ ዘቢ" ዑኡሲ ማላ፣ ጳኤፒ ዑኡሲና ዒላቴኔ፤ ዒዚ ዒላታዛ ለንካዎ ጉጉንያንሣ ፔ ዑኡዞና ዑኡዞና ጌሰቴኔ።

4 ዩያታ ፔ ዑኡዞና ጌሰቴ ዎዶ"ና ታኣኒ ፃኣፓኒ ማሌኔ፤ ጋዓንቴ፡- «ለንካዎ ጉጉንያንሣ ጌሰቴ ባኮ ዓኣቺ ዓርቄ፤ ፃኣፒፖ» ጋዓ ዑኡሲ ጫሪንጫፓ ታ ዎይዜኔ።

5 ዩካፓ ባዞ"ና ሳዖናይዳ ሄ'ርቂ ዔቂ ዓኣንቴ ታ ዛጌ ኪኢታንቻሣ ፔኤኮ ሚዛቆ ኩጮ ሌካ ጫሪንጮ ባንሣ ዔቂሳዖ፡

6 ዒዚ ናንገና ናንጋሣ፣ ጫሪንጮና ሳዖና ባዞ"ና ዩያቶይዳ ዓኣ ባኮ ቢያ ማዜ ያኣዛሣ ሱንያና ጫኣቄኔ፤ ዒ ጫኣቄሣ፡- «ዓካሪ ማይ ኔጋዓኬ!

7 ጋዓንቴ ለንካሳ ኪኢታንቻሣ ዛያሣ ዋርቃ ኬሎ"ንሣና ያኦሲም ማዳ፣ ዒዛ ማሊያ ኬኤዛዞንሣም ፔጋሲ ዔርዜ ጎይያና ዒዛኮ ዓኣሺንቴ ማሊያ ኩማንዳኔ» ጌይኬ።

8 ዩካፓ ጫሪንጫፓ ታ ዎይዜ ዑኡዛ፡- «ባዞ"ና ሳዖናይዳ ሄ'ርቂ ዔቂ ዓኣ ኪኢታንቻሣ ፔ ኩጫ ዔኬ፣ ቡሊ"ንቴ ዓኣ፣ ማሪንቴ ማፃኣፔሎ ዴንዲ ዔኬ» ጌይ ላሚ ሃሣ ታኣም ኬኤዜኔ።

9 ዩማና ታኣኒ ኪኢታንቻሣ ባንሣ ዓኣዲ፡- «ዳኮ"፣ ማሪንቴ ማፃኣፔሎ ታኣም ዒንጌ» ጋዓዛ፣ ዒዚያ፡- «ዔኪጋፓ፣ ዒዞ ሙዔ፤ ጎጾም ዒዛ ኔኤኮ ጫንቃንዳኔ፤ ዳንጋ ኔኤኮ ጋዓንቴ ዔኤሲጉዲ ዓኣፃንዳኔ» ታኣም ጌዔኔ።

10 ታኣኒ ዳኮ"፣ ማሪንቴ ማፃኣፔሎ ኪኢታንቻሣ ኩጫፓ ዔኪ ሙዓዛ ዳንጋ ታኣም ዔኤሲጉዲ ዓኣጻኔ፤ ጊንፃፓ ታኣኮ ጎጾ ዒዛ ጫንቄኔ።

11 ዩካፓ ሃሣ፡- «ሚርጌ ዓሶ ዜርያ ዛሎ"፣ ደማ ደማ ደሮ"ና ደማ ሙኡጮ ጌሰታ ዓሶና ካኣቶ"ና ዛሎ" ላሚ ሃሣ ያኦሲ ማሊሣ ኬኤዛንዳያ ኔና ኮይሳኔ» ታኣም ጌይንቴኔ።

11

ላምያ ማርካ

1 ዩካፓ ያዶሱዋና ዳልጉዋና ሃሣ ዔጰና ዋርቆያ ዎኦሺ ማላ ሚሣ ታኣም ዒንጊንታዖ፡- «ዓኣዲ፣ ያኦሲኮ ጌኤዦ ማኣሮና ያኦሲም ዒንጊያ ዒንጎ ቤዞና ዋርቄ፤ ሃሣ ዒኢካ ካኣሸካ ዓሶዋ ፓይዴ፤

10:7 ኪሲ. ማፃ 20፣11፤ ላሚ. ዎማ 32፣40፤ ዳኣኔ. 12፣7፤ ዓዋ. 3፣7። 10:10 ዒዚ. 2፣8-33። 11:1 ሂዚ. 40፣3፤ ዛካ. 2፣1-2።

2 ጌኤዡ ማኦርኮ ዙላ" ዓኣ ጳኦኮ" ጋዓንቴ ዋርቁፖ፣ ሃሼ"፤ ዩይ፡- ማሌ" ዳሮ"ም ዒንገንቴ ቤሲኬ፤ ዔያታ ያኦሲም ዲማጅ ካታሚሎ ያይዲታሚ" ላምዖ ዓገሊ ጉቤ ባሺ ወይሃንዳኔ፤

3 ላምዖ ታኣኮ ማርኮንሢ ሲዬ ፓቲሌ ማይንቲ ፔቴ" ሺያና ላምዖ ዌኤታና ላሂ"ታሚ" ከሌ" ታ ማሊሢ ከኤዛንዳጉዲ ዋልቁ ታ ዔያቶም ዒንጋንዳኔ» ጌይንቴ።

4 ዩንሢ ማርኮንሢ ሳዖይዳ ጎዳ ቤርታ ዔቃ፣ ላምዖ ሪሚቶ ሚዖንሢና ላምዖ ፖዖ ጌሦ ሻርኖንሢናኬ፤

5 ያኦኒያ ዔያቶ ማኣሳንሢ ማሌቶ ታሚ ዔያቶ ዳንጋፓ ከሰኪ ዩያቶ ሚቻንዳኔ፤ ዔያቶ ማኣሳንሢ ኮዓሢ ቢያ ሓይቃንዳ ጎይዖ ዩያይዲኬ።

6 ዔያታ ታ ማሊዖ ከኤዛ ወደ"ንሢዳ ዒርዚ ዋርቁዋጉዲ ጫሪንጮ ዲርቃኒ ዔያቶኮ ቢታንቶ ዓኣኔ፤ ዩያጉዲ ዋኣዖ ሱጉሢ ማሂ ላኣማኒ ከዔ ወደ"ና ቢያ ዓይጎ ባኣዚ"ናኣ ማዖም ሳዖ ባይዛንዳ ባኣዚ"ና ጳርቃኒ ቢታንቶ ዔያቶኮ ዓኣኔ።

7 ዔያታ ፔኤኮ ማርኮቶ ጋፔሴሢኮ ገንፃ ዴኤፖ፣ ዒጊቻ ዔታፓ ከሰካንዳ ቦዓሢ ዔያቶና ያልቲ ባሻንዳኔ፤ ወዲያ ዔያቶ ወዳንዳኔ።

8 ሌዛ ዔያቶኮ ኮኦኪንሢና ሶዶኦሚ፣ ሃሣ ገብፃ ጌይንታ ዴኤፖ ካታሚሎኮ ዓሳ ቡካ ጳኦካ" ከኤሪንታንዳኔ፤ ዩና ካታሚላ ዔያቶኮ ጎዳሢ ሱዲንቴ ካታሚሎኬ።

9 ዲዩማ ዲማ ዜርፃፓ፣ ቶኦካ"ፓ ሓሣ ዲማ ዲማ ሙኡቺ ጌሰታ ዓሰና ዳሮ"ናይዳፓ ማዔ ዓሳ ሓይሦ ከሌ"ና ዛላና ማዓንዳኣና ሌዛ ዔያቶኮ ዒኢካ ዓኣንቴ ዛጋንዳኔ፤ ሌዛ ዔያቶኮ ዲኡኪንቴዋጉዲ ላኣገንታያ ማዓንዳኔ፤

10 ዩንሢ፣ ላምዖ፣ ያኦሲ ማሊዖ ከኤዛዞንሢ ሳዖይዳ ናንጋ ዓሶ ሚታሴሢር ሳዖይዳ ናንጋ ዓሳ ዔያታ ሓይቁሢር ወዛዳንዳኔ፤ ዩያ ወዛ"ፓ ዔቁያና ዔያቶኮ ሓይቦ" ከሎ" ቦንቻ ከሌ" ማሂ፣ ዋሊም ዒንጎ ባኣዚ"ያ ዒንጋንዳኔ፤

11 ሓይሦ ከሌ"ና ዛላና ማዔሢኮ ገንፃ ጋዓንቴ ሺምፖ ዒንጋ፣ ያኦሲኮ ዑኡዛ ያኦሲዳፓ ሙኪ ሌዛ ዔያቶኮ ጌሌም፣ ዔያታ ዔቁሢር ዔያቶ ዛጌ ዓሳ ሚርጌና ዒጊጮኔ።

12 ዩካፓ ላምዖ ያኦሲ ማሊዖ ከኤዛዞንሢ፡- «ሓገጋ ከሰኩዋቴ!» ጋዓ ዴኤፒ ዑኡሲ ጫሪንጮፓ ዋይዜኔ፤ ዩማና

11:2 ሉቃ. 21፡24። 11:4 ዛካ. 4፡3፤ 4፡11-14። 11:6 1ካኣቶ". ማ 17፡1፤ ኬሲ. ማፃ 7፡17-19፤ 1ሳሙ. 4፡8። 11:7 ዳኣኔ. 7፡7፤ ዮሐ. ያፔዳ 13፡5-7፤ 17፡8። 11:8 ዒሲ. 1፡9-10። 11:11 ሂዚ. 37፡10።

ዔያቶኮ ሞርካ ዔያቶ ዛጋ ጎይሣ ዓኣንቴ ሻኦሬና ሌካ ጫሪንጮ ዔያታ ዓኣዳኔ።

13 ዒማ"ና ሳዓ ሚርጌ ዓጊጭኔ፤ ካታሚሎኮዋ ታጾይዳፓ ፔቴ"ማ ማዓ፥ ቤዛ ቢያ ዶዒ ጋፔኔ፤ ዩያይዲ ዓጊጫጾና ለንካይ ሺያ ዓሲ ሓይቄኔ፤ ሓይባ"ፓ ዓቴዘንሢ ሚርጌና ዓጊጫ፤ ጫሪንጮ ያኣዛሢ ጋላቲ፥ ቦንቹኔ።

14 ለምዓሳ ሚታሢ ዋዳ" ጋፔኔ፤ ሓይሾ ዓካሪ ሃይሣሳ ሚታሢ ዋዳ" ዑኩና ዩዓንዳኔ።

ኪኢታንቻሢ ዋርቄ ለንካሳ ዛያሢ

15 ለንካሳ ኪኢታንቻሢ ዛያሢ ዋርቃዛ፥ ጫሪንጮይዳ፡- «ዓጮ" ካኣቱማ

ኑ ጎዳሢ ማዔ ያኣዛሢና ዒዛኮ ሚሲሔናም ማዔኔ፤ ዒዚያ ናንጊና ካኣታዳንዳኔ» ጋዓ ዳኤፔ፥ ዳኤፔ ዑኡሲ ዋይዚንቴኔ።

16 ያኦሲ ቤርታ፥ ካኣቱም ያይቶይዳ ዴዒ ዓኣ፥ ለማታም ያይዶ ጋርቾንሢ ባሊቶና ሳዖ ባንሢ ሃርኪ ጌዒ ጉምዓቲ ያኦሲም ዚጌኔ፤

17 ዔያታ ዚጋ ዋዳ"ና፡- «ሓሢ ዓኣያ ሚናፓ ናንጋያ

ቢያ ባኣዚ" ዳንዳዓ ጎዳ ማዔ ያኣዛሢዮ! ዳኤፖ ዋልቆ፥ ኔኤር ኔ ማሃሢር ሓሣ ኔ ካኣታዳሢርዋ ኔና ኑ ጋላታኔ።

18 ሚሌ" ዴራ" ሚርጌና ዳጋዳኔ፤

ሃሣ ኔ ዳጋ"ኣ ሙኩኔ፤ ሓይቄ ዓሲይዳ ኔ ዋጋ ዋዳ"ኣ ሃሌ"ኔ።

ኔኤም ማዳ፥ ኔ ማሊያ ከኤዛዘንሢና ኔኤም ዱማዳዘንሢና ሱንጾዋ ኔኤኮ ቦንቻዘንሢም ዳኮ"ና ዳኤፖ ማዔዘንሢናም

ዔያታ ማዳሢ ዛሎ" ማሃ ኔ ዒንጋንዳ ዋዳ" ሓሣ ዓጮ" ባይዜዘንሢና ኔ ባይዘንዳ ዋዳ" ሃሌ"ኔ» ጌዔኔ።

19 ዩካፓ ጫሪንጫ ዓኣ፥ ያኦሲኮ ጌኤዠ ማኣራ ቡሊ"ንታዛ ጋርይዳ ዒዛኮ ጫኣቁም ሳኣጺና ዓኣያ ማዒ ጴዳኔ፤ ዩማና ዜኤሊንሢ ዜኤሊንሢኔ፥ ዳኤፔ ዑኡሲ ዋይዚንቴኔ፥ ጉጉንሢያ ጉጉንሢኔ፥ ሳዓኣ ዓጊጭኔ፥ ዳኤፔ ሻቹያ ከዴ"ኔ።

11:12 2ካኣቶ. ማ 2፥11። 11:13 ዮሐ. ያፔዳ 6፥12፤ 16፥18። 11:15 ከሲ. ማፃ 15፥18፤ ዳኣኔ. 2፥44፤ 7፥14። 11:18 ዓይኑ. 2፥5፤ 110፥5፤ 115፥13። 11:19 ዮሐ. ያፔዳ 8፥5፤ 16፥18፤ 21።

12

ለአሌሎና ጳጳሪ ሸኦሃሂና

1 ይካገ ጳጳሪ ሃሃድ ደቃሂ ሄርሺሳ ማላታ ጫሪንጮይዳ ጳጳሪ፤
ዲኢካ ዓቢ ማኦገጉዲ ማይንቲ፥ ዓገሮ ቶኪና ሄርቁ ዔቁ፥ ሃሃታጾ
ለምጋ ዠኦገገ ቦንቾሮ ዓገ ባኮጉዲ ፔኤኮ ቶኦካ" ዓገንቲ ዓኣ ፔቲ"
ለአሊሰከና ጳጳሪ።

2 ዓዛ ጎጲና ዓኣያታጋ ሸይቺ ዓርቁም ማታዲ ዒላቲኔ፤

3 ዩያጉዲ ሃሃ ማሌ" ማላታ ማዔ ባኣዚ" ጫሪንጫ ጳጳሪ፤
ዩይያ፡- ለንካይ ቶኦኪና ታጾ ጉራኒና ዓኣ፥ ጳጳሪ ዞቁ ፑኤገ ሸኦሃሂ
ጳጳሪ፤ ዒዚ ፔኤኮ ዑንኮና ዛላኮ ዛላ ገንሂ ማግ ዠኦገገ ቢያ

4 ዒዚ ፔኤኮ ዑንኮና ዛላኮ ዛላ ገንሂ ማግ ዠኦገገ ቢያ
ጫሪንጫገ ጎቺ ዔኪ ሳዓ ኬኤራሬ፤ ዩካገ ላኣሌላ ሸዓዛ፥ ናጋ
ሙዓኒ ላኣሌሎኮ ቤርታ ዔቁኔ፤

5 ላኣሌላ ዓጮ" ዴሮ" ቢያ ባሺ፥ ዋይሃንዳ ዓቲንቁና ሮይ ሸዔኔ፤
ናዓሂ ጋዓንቲ ሌካ ጾኦሲኮ ካኣቱም ጾይቶ ባንሂ ዔውቲኔ፤

6 ዒማ"ና ላኣሌላ ዓሲ ናንጉዋ ዳውሎ" ዓኣሺንቲ ዓኣጳጳ፤
ዲኢካ ፔቲ" ሺያና ለምጋ ጻኤታና ላሂ"ታሚ" ኬሊ" ኮይሳ ባኣዚ"
ቢያ ዒንገ ካገንታንዳ ቤሲ ጾኦሲ ዒዛም ገኢገሺኔ።

7 ዩካገ ጫሪንጫይዳ ጾልዚ ዔቁኔ፤ ዲኢካ ሚካዔኤሌ ገይንታ
ከኢታንቻሂና ዒዛም ዓይሂንቲ ማዳ ከኢታንቻ ጳጳሪ ሸኦሃሂና
ዒዛኮ ከኢታንቻና ዋላ" ጾላቲሂ ዓርቁኔ፤

8 ጋዓንቲ ጳጳሪ ሸኦሃሂና ዒዛኮ ከኢታንቻና ባሺንቲኔ፤
ዩማገ ጫሪንጫ ዔያቶኮ ቤሲ ባይቁኔ።

9 ጳጳሪ ሸኦሃሂ ሊካ ሳዓ ኬኤራገንቲ፤ ዩይ፡- ዓሶ ቢያ
ዳቢሻሂ፥ ዲያቢሎሴ ሃሃ ገንሃ ፃላሂ ገይንታ ሚናኣ ሸኦሃሂኬ፤
ዒዛና ዋላ" ዒዛኮ ከኢታንቻኣ ኬኤራገንቲ።

10 ዩካገ ፔቲ" ጳጳሪ ዑኡሲ ጫሪንጫይዳ፡-

«ዓካሪ፥ ዳቁሺሂና ዋልቁና

ሃሃ ካኣቱም ኦ ጾኦዛሂም ማዔኔ፤

ቢታንቶዋ ማሲሔም ማዔኔ!

ዋይቲ ገዔቲ ኦ ዒሸንሂና ኦ ሚሸንሂና

ኦ ጾኦዛሂ ቤርታ ዋንቲና ሮኦሪና

«ዔያታ ዳቤያኬ» ገዒ ፑሸካሂ ኬኤራገንቲ።

12:3 ዳኣኔ. 7:7። 12:4 ዳኣኔ. 8:10። 12:5 ዒሲ. 66:7፤ ዓይኔ. 2:9።

12:7 ዳኣኔ. 10:13፤ 12:1፤ ጸሀ. 9። 12:9 ማኸ. ማግ 3:1፤ ሉቃ. 10:18።

12:10 ዒዮ. 1:9-11፤ ዛካ. 3:1።

- 11 ዔያታ ማራዓሢኮ ሱጉያና
 ሃሣ ዔያታ ማርካዴ ማርካቶና
 ያሊ ዔያታ ዒዛ ባሸኔ፤
- ፔ ሹምፓሢ ሃሣ ዔያታ ሚጨንቱዋ?
 ፔና ሃይቢም ዓኣሢ ዒንጌኔ፤
- 12 ዬያሮ ጫሪንጮና ዒኢካ ናንጋዞንሢዮ ዋዛዲዋቴ!
 ሳያንታ ባዞ"ንታ ዒንሢም ጋዓንቱ ባዴዔቴ!
 ዓይጎር ጌዔቴ ዲያቢሎኦኦ ዒ ማዳንዳ ዋዳ" ዳካ" ሌሊ ዓቴ"ሢ
 ዔሬ
 ዴኤፒ ዳጋና ዒንሢ ባንሢ ኬዴ"ኔ» ጋዓንቱ ታ ዋይዜኔ።
- 13 ዴኤፖ ሹኦዣሢ ሳያይዳ ኬኤሪንቱሢ ዛጋያ ዓቴንቆ ናዓሢ
 ሹዔ ለኣሌሎ ዳውሴኔ፤
- 14 ዬማና ለኣሌላ ዓሲ ናንጉዋ ዳውሎይዳ ዒዞም ጊኢጊሸና
 ቤዞ ባራኒ ዓኣዳንዳጉዲ ዴኤፒ፣ ኮኦኬ ጋኣሲ ማላ ላምያ ጋኣሲ
 ዒዞም ዒንጊንቱ፤ ዬይያ፡- ዒኢካ ሹኦዣሢዳፓ ሃኪ ሓይሦ ሌዔና
 ዛለና ኮይሳ ባኣዚ" ዒዞም ዒንጊንቱም ሜታ ባኣያ
 ናንጋንዳጉዲኬ።
- 15 ለኣሌሎ ዲጲ ሙዓንዳጉዲ ሹኦዣሢ ዋርዚ ዋኣሢጉዴ፥
 ዲቢ ዋኣሢ ዳንጋፓ ኬሲ" ለኣሌሎ ጊንያ ጮኦሸኬኔ።
- 16 ሳዓ ጋዓንቱ ለኣሌሎ ማኣዳ"ኒ ሹኦኪንቱ፥ ዴኤፖ ሹኦዣሢ ፔ
 ዳንጋፓ ኬሲ" ለኣሌ ዋኣያ ዑሽኬኔ።
- 17 ዒማ"ና ሹኦዣሢ ለኣሌሎይዳ ዳጋዲ ያኦሲ ዓይሢያ
 ካፓዞንሢና ዬሱሴም ጉሙርቁንታያ ማዒ ማርካዳ፥ ዒዞ ዜርፃፓ
 ዓቴዞንሢና ያልታኒ ዓኣዴኔ።
- 18 ዴኤፖ ሹኦዣሢ ባዞ" ዓጫ ዓኣ፥ ማኣሻላ" ዔቄኔ።

13

ባዞ"ና ሳያናፓ ኬሰኬ ላምያ ቦያንሢ

- 1 ዬካፓ ፔቴ" ቦያ ባዞ"ፓ ኬሰካንቱ ታ ዛጌኔ፤ ዬያኮ ታጾ ጉራኒና
 ለንካይ ቶኦኪና ዓኣያ ማዓዛ፥ ዒዞኮ ጉራኖይዳ ታጾ ቦንቸሮ ዓጎ
 ባካ ዓጊንቱ ዓኣኔ፤ ሃሣ ዒዞኮ ቶኦኮ"ንሢዳ ጫሺ ሱንሢ
 ፃኣፒንቱ ዓኣኔ።
- 2 ዬይ ታ ዛጌ ቦዓሢ ማኣኪ ማላያኬ፤ ቶካ ዒዞኮ ጋዓንቱ
 ጉዲሪ ማላ «ዲቤ» ጌይንታ ቦያ ቶኪ ማላያ፥ ዳንጋ ሃሣ ዒዞኮ

12:14 ዳኣኔ. 7፥25፤ 12፥7። 13:1 ዳኣኔ. 7፥3፤ የሐ. ያፔዳ 17፥3፤ 17፥7-12።

ዘቢ" ደንጋ ማላያኮ። ዴኤፖ ሾኑዣሢ ፔኤኮ ዋልቆና ፔኤኮ ካኣቱሞ ያይቶ ሃሣ ዴኤፖ ቢታንቶሞ ዬያ ቦላሢሞ ሲንገኔ።

3 ዓዛ ቶኦኮኮ ፔቲ"ማይዳ ዋዳንዳያ ማላ ኪሢ ሳኣያ ታ ዛገኔ። ጋሳንቲ ዬይ ኪፃ ፓጭ። ሳጮ" ሳሳ ቢያ ዲቃቲ ሄርሺ ሄርሺ ሲዛ ጊንፖ ሳኣዳ።

4 ቦላሢሞ ሲዚ ቢታንቶ ሲንገሢሢሮ ሳሳ ቢያ ዴኤፖ ሾኑዣሢሞ ዘገኔ፤ ዔያታ ዚጋሢ፡- «ቦላሢጉዲ ማሳንዳይ ያናዳይ? ሲዛና ዋላ" ያልታንዳሢ ያናዳይ?» ጌሲ ጌሲኮ።

5 ያቶርቁ ጌስታንዳያና ጫሺ ጫሽካንዳ ደንጋ ቦላሢሞ ሲንገንቲ፤ ሃሣ ያይዲታሚ" ላምፖ ሳጊኒያ ሲዚ ቢታንቶና ማዳንዳጉዲ ሲዛሞ ሳይሢንቲ።

6 ዓዚ ያኦሲንታ ያኦሲ ሱንፖንታ ያኦሲ ናንጋ ቤዘንታ ሃሣ ጫሪንጫ ናንጋዘንሢያ ጫሽኪሢ ሳርቄ።

7 ያኦሲም ዲማዴ ሳሶ ሲ ያላንዳጉዲና ያሊያ ባሻንዳ ቢታንቶ ሲዛሞ ሲንገንቲ። ዲማ ዲማ ዜርፆ፣ ቶኦኮ"፣ ዲማ ሙኡቺ ጌስታ ሳሶ፣ ዲማ ዲማ ዴሮ" ዑፃ ቢታንቶ ሲዛሞ ሲንገንቲ።

8 ሳሳ ማዢንቲማፓ ሳርቃፖ ዋድና ማራሳሢኮ ናንጎ ማፃኣፓ ሱንፃ ፃኣፒንቲባኣያ፣ ሳይዳ ናንጋ ሳሳ ቢያ ቦላሢሞ ዘጊ ካኣሽካንዳ።

9 «ዋይዛ ዋይዚ ሳኣይ ሳኣቶ ዋይዘንጎ!

10 ያኦኒያ ዲሲንታኒ ሳኣይ ሳኣቲ ዲሲንታንዳ፤

ጩንቻ ሳፓሮና ሓይቃንዳይ ሳኣቶ

ጩንቻና ሓይቃንዳ።»

ሳኣሪ፣ ያኦሲም ዲማዴ ሳሶኮ ጊቢ" ዳንዳሲያና ጉሙርቁያና ዔርታንዳሢ ዬኖ ዋድ"ናኮ።

11 ዬካፓ ሃሣ ማሌ" ቦፖ ሳሳፓ ኬስካንቲ ታ ዛገኔ፤ ዬያኮ ማራይ ጉራኒ ማላ፣ ላምፖ ጉራኒ ሳኣ፤ ሲ ጌስታ ጎይፃ ዴኤፖ ሾኑዣሢ ጎይፃኮ።

12 ቤርታኣ ቦላሢ ሱንፖና ጉቤ ቢታንቶ ሳኣያ ማሲ ሲ ማዳ፤ ሳያና ሲኣካ ናንጋ ሳሳ ቢያ ዋዳኒ ዑኬ ኪፃ ፓጭ፣ ቤርታኣ ቦላሢሞ ዘጊ ካኣሽካንዳጉዲ ሳሶ ማሄ።

13 ዬይ ላምሳሳ ቦላሢ ሳሶ ቤርታ ጫሪንጫፓ ታሚ ኬይሳንዳያ ሄላ"ንዳኣና ሲዛኮ ሳኣ ቢታንቶና ዴኤፒ ዴኤፒ ማላታ ዳዋ።

13:2 ዳኣኔ. 7፣4-6። 13:6 ዳኣኔ. 7፣8፤ 11፣36። 13:7 ዳኣኔ. 7፣21። 13:8 ሳይኦ. 69፣28። 13:10 ዔር. 15፣2፤ 43፣11።

14 ቤርታኦ ቦላሢ ሱንጾና ዒ ማዳንዳጉዲ ቢታንቶ ዒዛም
ዒንገንቴያታሢሮ ዒ ዳዋ ማላቶ ዛሎ"ና ሳዓ ናንጋ ዓሶ ቢያ
ዳቢሻኔ፤ ሃሃ ጩንቾ ዓፓሮና ኪፃሶናንቴ ዳቄ፣ ቦላሢኮ ማላታ
ማዣንዳጉዲ ዓሶ ዓይሢ።

15 ዬያ ቦላሢም ቤርታኦ ቦላሢኮ ማላቶም ሾምፖ ዒንጋ ዑኡሲ
ዒንጋንዳጉዲ ቢታንቶ ዒንገንቴኔ፤ ዬይ ቢታንታ ዒንገንቴሢ
ማላታ ጌሰታንዳጉዲና ዬያ ማላቶም ዘጊ ካኦሽኩዋ ዓሳ
ሐይቃንዳጉዲ ማሆም ጌይኩ።

16 ዬያጉዲ ሃሃ ዳኮ" ማዕቴያ ዳኤፓ፣ ዖርጎጮ ዓሶ ማዕቴያ
ማንቆ ዓሳ፣ ማዲሻሢ ማዕቴያ ማዳ ዓሳ ቢያ ፔኤኮ ሚዛቆ
ኩጮይዳታቴያ ባሊቶይዳ ማላቶ ጌሃንዳንጉዲ ዓሶይዳ
ዋልቃዳ፤

17 ዬይ ያዲ ማዕሢ ቦላሢ ሱንጾ ማዕ፣ ማላታ ሃሃ ገንሃ
ፓይዳ"ባኦ ዓይጎ ዓሲያ ዔኤቢ ሻንቻኒና ሻንቃኒያ
ዳንዳዑዋጉዲኩ።

18 ዬይ ዔራቶ ኮይሳያኩ፤ ዒኔና ጩንጫ ማዕሢ ቦላሢኮ
ፓይዳ" ፓይዳ ዔሮንጎ፤ ዓይጎሮ ጌዔቴ ፓይዳ" ዓሲ ፓይዲ
ማዕሢሮኩ፤ ዬና ፓይዳ" ላሆ" ጃኤታና ላሂ"ታሚ" ላሆ"ኩ።

14

ማራዓሢንታ ጃኤታና ዖይዲታሚ" ዖይደ ሺዮ ዓሶ

1 ዬካፓ ሐሃ ማራዓሢ ጃዮኔ ዲኮ"ይዳ ዔቂ ዓኦንቴ ታ ዛጌ፤
ዒዛና ዋላ" ዒዛ ሱንጾና ዒዛኮ ዓደ ሱጾና ባሊታ ፃኦፔንቴ ዓኦ፣
ጃኤታና ዖይዲታሚ" ዖይደ ሺያ ዓሲ ዓኦ።

2 ዬኖና ጫሪንጮይዳፓ ዳኤፔ ሶኦሪንታ ዋኦሢ ዑኡሲ ሃሃ
ዳኤፔ ጉጉንሢ ማላ ዑኡሲ ታ ዋይዜኔ፤ ዬይ ታ ዋይዜ ዑኡዛ
ጎኦ" ዓይናዲ ዋርቃ ዓሳ ጎኦ" ዋርቃዛ ዋይዚንታ
ዑኡዛጉዳያኩ።

3 ካኦቱዋ ዖይቶና ዖይደ ባኮንሢና ሃሃ ጋርቾንሢ ቤርታ ዬና
ዲቦ" ዓሳ ቤርታ ጌይንቴ ቤቂባኦ፣ ያኦሲ ቦንቾም ማዓ ዓይኑዋ
ዓይናዳ፤ ዬያ ዓይኑዋ ዓጮ" ቢያይዳፓ ሻንቂ፣ ዲማሲ ዔኮና
ጃኤታና ዖይዲታሚ" ዖይደ ሺዮ ዓሶፓ ዓታዛ ሜሌ" ያኦኒያ ዔሪ
ጋዒ ዳንዳዒባኦ።

4 ዬያታ ኩሙሢ ማዕሢሮ ላኦሊና ዒኢቲባኦያኩ፤ ዔያታ
ማራዓሢ ዓኦዳ ቤዘ ቢያ ዒዛ ገንጾ ዓኦዳያኩ፤ ሃሃ ዔያታ ያኦሲና

14:1 ሂዚ. 9:4፤ ዮሐ. ያፔዳ 7:3።

ማራዳሚናኮ ቶይዶ ማዳኒ ዓሶ ባአካ"ፓ ሻንቁ፥ ደማሲ ዔኮና
ዓሶኬ።

5 ዔይታ ሉኡዙዋ ሉኡቂ ዔሩዋያኬ፤ ሃሃ ዔይቶ ቦሂሳ ባአዚ"ያ
ባአያኬ።

ሃይሃ ያሕሲ ከኢታንቸንሢ

6 ዩካፓ ሳይይዳ ናንጋ ዴሮ"ና ዜርጾና ደማ ሙኡጮ ጌሰታ ዓሶና
ደማ ደማ ቶኦኮ"ናም ቢያ ናንገና ባይቁዋ ኮዥ ሓይሶ ኬኤዛኒ
ኮሺ ሃይሴ ዔኪ ዓአ፥ ማሌ" ከኢታንቸ ጫሪንጫ ባራናንቲ ታ
ዛጌኔ፤

7 ዩይ ዴኤፒ ዑኡሲና፡- «ያሕሲ ዒጊጩዋቲ፤ ሃሃ ቦንቸዋቲ፤
ዓይጎሮ ጌዔቲ ዒዛኮ ዋጎ ዋጎ ዋዳ" ሄሌ"ኔ፤ ጫሪንጮና ሳዖና
ባዘ"ና ዓልቃ ዋኦያና ማዜ ያኦዛሢም ዚጉዋቲ!» ጌዔኔ።

8 ማሌ" ለምዓሳ ከኢታንቸሃ፡- «ፑርታ፥ ዒኢሳ ማዶ ማዶሻ፥
ማሃ ዳጋጾ ዴሮ" ቢያ ዑሼ፥ ዴኤፖ ባብሎኔ ካታሚላ ደዔኔ!
ደዔኔ!» ጌዒ ጌዒ ቤርታኦ ከኢታንቸሃ ጊንጾ ዓአዴኔ።

9 ሓይሃሳ ከኢታንቸሰኬይ ሃሃ ዴኤፒ ዑኡሲና፡- «ቦዓሢና
ዒዛኮ ማላቶናም ዚጊ ካአሽካሢ ሃሃ ማላቶዋ ባሊታታቲያ ኩጮ
ዑፃ ዓይሢሢ ቢያ፡

10 ዓይጎ ባአዚ"ናኦ ሲኢሪንቲባኦ፥ ያሕሲኮ ጎሪ"ንቶ ዑዥ
ዓንጎይዳ ኩንሃና ጎሪ"ንቶ ዳጋጾ ዑዥ ዑሽካንዳኔ፤ ዩያጉዲ ሃሃ
ያሕሲም ደማዴ ከኢታንቸና ማራዳሚና ቤርታ ታሚና ታሚ
ዩኢሊ"ናይዳ ዓጊንቲ ማታዳንዳኔ፤

11 ዔይቶ ማታሳ ታሞይዳፓ ኬሰካ ጩባ" ናንገና ባይቁዋጾ
ጩቢ ዴዓያ ማዓንዳኔ፤ ቦዓሢና ዒዛኮ ማላቶናም ዚጊ፥ ዒዛኮ
ሱንጾ ማላቶዋ ዔኪ ዓአዘንሢኮ ቢያ ሮኦሪና ዋንቲና ሓውሾ ባአያ
ማዓንዳኔ» ጌዒ ጌዒ ሓንጎዋቶ ጊንጾ ሃሃ ዓአዴኔ።

12 ያሕሲ ዓይሢያ ካፓዘንሢና ዩሱሴም ጉሙርቁንታያ ማዒ፥
ደዳዘንሢኮ ጊቢ" ደንደዒፃ ዔርታንደሢ ዒኢካኬ።

13 ዒማ"ና ሃሃ ጫሪንጮይዳፓ፡- « ሓይካፓ ሰካ ጎዳ ዩሱሴር
ማዒ ሓይቃዘንሢ ባሊቲና ዓአያኬ» ጌዒ ፃኦፔ» ጋዓ ዑኡሲ ታ
ዋይዜኔ። ዓያና ጌኤዥ፡- «ሂዮ፥ ዔይቶኮ ማዳ" ዔይቶና ዋላ"
ዓአዳንደሢሮ ላቢ"ፃፓ ዔይታ ሃውሻንዳኔ» ጋዓኔ።

14 ዩካፓ ቦኦሪ ሻኦሪ ታ ዛጌኔ፤ ዒማ"ና ሻኦሪ ዑይይዳ ዓሲ
ናዓሢ ማላ ዓሲ ዴዒ ዓአኔ፤ ዒዚ ቶኦኮ"ይዳ ዋርቁና ኮሺ"ንቲ፥

14:8 ዒ.ሲ. 21፥9፤ ዔ.ር. 51፥8፤ ዮ.ሐ. ጾፔዳ 18፥2። 14:10 ዒ.ሲ. 51፥17፤ ማዜ.
ማፃ 19፥24፤ ሂዚ. 38፥22። 14:11 ዒ.ሲ. 34፥10።

ቦንቸር ዓሳ ባኮ ዓገረ ዓኣኔ፤ ኩጮይዳኣ ሃሃዕ ዓጮ፣ ባኣቸ፣ ዓርቂ ዓኣኔ።

15 ሜሌ" ከኢታንቸ ሃሃዕ ጌኤዮ ማኣራፓ ኬሰካዖ ሻኣር ዑፃ ዴዔህሂም ዴኤፒ ዑኡሲና፡- «ሳዓ፡ ጮኦርንደያ፡-ዲ ካፃኔ፤ ጮኦርንደ ዋዳ"ኣ ሄሌ"ህሂር ጮኦር ባኣጮና ጮኦሪ» ጋዓዛ፡

16 ሻኣር ዑፃ ዴዔ ዓኣህሂ ባኣጮ ሳዖ ባንህሂ ዳካዛ ሳዓ ጮኦሪንቴኔ። *

17 ዩያ፡-ዲ ሜሌ" ከኢታንቸ ሃሃዕ ጮሪንጮ ዓኣ፡ ጌኤዮ ማኣራፓ ኬሰኔ፤ ዲዚያ ዓጮ፣ ባኣቸ፣ ዔኪ ዓኣኔ።

18 ሜሌ" ገንሃ ታሚ ዑፃ ቢታንቶ ዓኣ፡ ከኢታንቸ ያሕሲም ዒንገረ ካኣሽኮ ቤዛፓ ኬሰካዖ፡ ዓጮ፣ ባኣጮ ዔኪ ዓኣ ከኢታንቸህሂም፡- «ሳዖይዳ ዓኣ ዋይኖ ዓኣፖኮ ካፃዖ ሶያ ዔርዛህሂር ሳዖይዳፓ ዋይኖ ቲቂ ቲቂ ዔኤ» ጌዒ ዴኤፒ ዑኡሲና ዲላቴኔ።

19 ከኢታንቸህሂ ዒማ"ና ባኣጮ ሳዖ ባንህሂ ዳኪ ዋይኖኮ ሶኖ ቲቂ ቲቂ ዔኤሰካፓ ያሕሲ ዳጎና ዋይኖ ሄ'ርቂ ጮኤጶ ቤዛ ዓጌኔ።

20 ዩይ ዋይኖ ካታሞኮ ዙላ"፡ ዋይኖ ሄ'ርቂ ጮኤጶ ቤዛ፡ ጮኤጶጊንቴኔ፤ ዩካፓ ኬሰኔ ሱፐፃ ሓይሃ ዋዳ ማዓንዳያ ሳዓፓ ዴጊ ጌዔኔ፤ ሃሃዕ ሱፐፃ ጎዒ ዴንዴ ያደሱማ ሃይሃ ፃኤታ ሺያ ታኣካ" ሄላ"ያ ማዔኔ።

15

ጋፒንዖ ማዔ ባይዛ ባኮ ዔኪ ዓኣ ከኢታንቸንህሂ

1 ዩካፓ ሜሌ" ዴኤፒ ሃሃዕ ዲቃህሂ ሄርሺሳ ማላታ ጮሪንጮ ታ ዛጌኔ፤ ዩይያ፡- ያሕሲ ዳጋ" ዔያቶና ኩማያ ማዔ፡ ላንካይ ባይዛ ባኣዚ" ዔኪ ዓኣ፡ ላንካይ ከኢታንቸ ታ ዛጌኔ።

2 ዒማ"ና ሃሃዕ ታሚ ሲኢሪንቴያ ሌማሌኤሺ ባዚ" ማላያ ታ ዴንቄኔ፤ ዒኢካ ባዙ" ዓጮ፣ ቦዓሂና ቦዓሂኮ ማላቶና ሃሃዕ ዒዛ ሱንዖ ፓይደ" ያሊ ባሺ ዓሳ ዔቂ ዓኣንቴ ታ ዴንቄኔ፤ ዔያታ ያሕሲዳፓ ዒንገንቴ ጎኦላ" ዔኪ ዓኣኔ፤

3 ዔያታ ያሕሲም ማዳ፡ ሙሴ ዓይኑሞና ማራዓሂናኮ ዓይኑሞ፡- «ቢያ ባኣዚ" ዳንዳዓ ጎዳ ማዔ ያኢዛህሂዮ! ማዳ" ኔኤኮ ዴኤፒ ሃሃዕ ዲቃህሂ ሄርሺሳያኮ፤

14:14 ዳኣኔ. 7፡13። 14:15 ዓ.ጸ. 3፡13። * 14:16 ሳዓ ጮኦሪንቴኔ፡- ጌይንቴህሂ ጋፒንዖ ዋጎ ኬሎ"ና ከኢታንቸ ሳዖይዳ ዓኣ ዓሶ ዓኪ ያሕሲ ቤርቶ ሺኢሻንዳህሂ ዛላ ኬኤዞናያኮ። 14:20 ዓ.ሲ. 63፡3፤ ዔር. ቃ 1፡15፤ የሓ. ያፔዳ 19፡15።

ሚርጌ ዳሮ"ኮ ካአታ"ሢሮ!
 ኔኤኮ ጎይፃ ፒዜ ሃሣ ጎኔኬ።
 4 ጎዳሢሮ! ኔና ዒጊጩዋያ
 ሐሣ ሱ"ንፆዋ ኔኤኮ ቦንቹዋይ ያናዳይ?
 ኔኤኔ ሌሊ ዲማዴያኬ።
 ኔኤኮ ፒዜ ማዳ" ፔጋዲ ዔርቴሢሮ
 ዲቦ" ዳራ" ቢያ ሙኪ ኔ ቤርታ ኔኤም ዚጋንዳኔ»
 ጌዒ ጌዒ ዓይናዳኔ።

5 ዩካፓ ሃሣ ዓፒላና ማዢንቴ፣ ፆኦሲም ዲማዴ፣ ጌኤሺ ማአሪ ጫሪንጫ ቡሊ"ንቴ ዓአንቴ ታ ዛጌኔ፤

6 ዒማ"ና ለንካዋ ባይዛ ባኮንሢ ዔኪ ዓአ፣ ለንካይ ከኢታንቻ ጌኤዢ ማአራፓ ኬሰኬኔ፤ ዩያታ ዓአፒዳ ዲካ ቦኦሬ ማአፆ ማይንቴ ዓአኔ፤ ሃሣ ዳድ"ይዳአ ዋርቆና ኮሺ"ንቴ ቃልሾ ቱኡተ ዓአኔ።

7 ዩኖና ያይዳ ባኮንሢዳፓ ፔቴ"ሢ ናንጊና ናንጋ ፆኦዛሢኮ ዳጋ" ኩሚ ዓአ፣ ዋርቆና ኮሺ"ንቴ ለንካይ ዑሺ ዓንጊ ለንካዋ ከኢታንቻንሢም ዒንጌኔ፤

8 ሃሣ ጌኤዢ ማአራ ፆኦሲኮ ቦንቹና ዋልቆናይዳፓ ኬሰካ ጩቦ"ና ኩሜኔ፤ ለንካዋ ከኢታንቻንሢኮ ለንካዋ ባይዛ ባኮንሢ ማዲንቴ ኩማንዳያ ሄላ"ንዳአና ፆኦኒያ ጌኤዢ ማአሮ ጌላኒ ዳንዳዒባአሴ።

16

ፆኦሲኮ ዳጋ" ኩሜ ለንካዋ ዑዢ ዓንጎ

1 ዩካፓ ለንካዋ ከኢታንቻንሢም ዴኤፒ ዑኡሲና፡- «ዓአዲዋቴ! ፆኦሲኮ ዳጋ" ኩሜ፣ ዑዢ ዓንጎይዳ ዓአ ዑዢ ሳፆይዳ ላአሉዋቴ» ጌኤዢ ማአራፓ ጋዓንቴ ታ ዋይዜኔ።

2 ዒማ"ና ቤርታጎ ከኢታንቻሢ ዴንዳፆ፣ ዑዢ ዓንጎይዳ ዓአ ዑዢ ሳፆይዳ ላአላዛ ቦዓሢኮ ማላቶ ዔኪ ዓአ ዓሶና ዩያ ማላቶም ዚጊ ካአሽካ ዓሶናይዳ ፑርታ ሜታጎ ከሢ ኬዴ"ኔ።

3 ለምዓጎ ከኢታንቻሢ ዑዢ ዓንጎይዳ ዓአ ዑዢ ባዘ" ዋአፆይዳ ላአላዛ፣ ዋአፆ ሐይቄ ዓሲ ሱጉሢጉዲ ካርቴ ሱጉሢ ማዔኔ፤ ባዘ"ይዳ ዓአ፣ ሺምፔና ናንጋ ባካ ቢያ ሐይቄኔ።

15:3 ኬሲ. ማፃ 15፡1። 15:4 ዔር. 10፡7፤ ዓይኑ. 86፡9። 15:5 ኬሲ. ማፃ 38፡21። 15:8 ኬሲ. ማፃ 40፡34፤ 1ካአቶ". ማ 8፡10-11፤ 2ፆኦሲ. ዓሃኬ 5፡13-14፤ ዒሲ. 6፡4። 16:2 ኬሲ. ማፃ 9፡10።

4 ሐይሣሳ ኪኢታንቻሢ ዑዠ ሳንጎይዳ ዓኣ ዑዠ ዋር ዋኦንታ
ዓልቃ ዋኦንታይዳ ላኣላዛ፥ ዬይያ ሱጉሢ ማዕኔ፤

5 ዬካፓ ዋኦንታ ዑፃ ቢታንታ ዓኣ፥ ኪኢታንቻሢ፡-

«ሐሢያ ዓኣያ ሚናፓ ናንጋ ዲማዴ ጎዳሢዮ!

ሐያይዲ ኔ ዋጌሢሮ

ኔኤኒ ዲሎ"ኬ፤

6 ዓሳ ኔኤም ዲማዴዘንሢንታ ኔ ማሊያ ኬኤዘዘንሢያ

ዋዲ ሱጉያ ላኣሌሢሮ

ኔኤኒ ዔያቶ ሱጉሢ ዑሹ"ኔ፤

ዬይ ዔያቶም ኮይሳያኬ»

ጋዓንቴ ታ ዋይዜኔ።

7 ዬያጉዲ ሃሃ ጾኦሲም ዒንጊ ካኣሸኮ ቤዘይዳፓ፡-

«ሂዮ፤ ቢያ ባኣዚ" ዳንዳዓ ጎዳ ማዕ ያኦዘሢዮ!

ኔኤኮ ዋጊፃ ጎኔ፥ ሃሃ ፒዜኬ» ጋዓ ዑኡሲ ታ ዋይዜኔ።

8 ያይዳሳ ኪኢታንቻሢ ዑዠ ሳንጎይዳ ዓኣ ዑዠ ዓባ" ላኣላዛ፥
ዓባ"ም ዓሳ ዓዳ" ታሚጉዲ ሚቻንዳ ዋልቁ ዒንጊንቴኔ፤

9 ዬያር ዓሳ ዴኤፒ ሩኡጲና ሚቸንቴኔ፤ ዬንሢ ዓይዘ ባኮንሢ
ዑፃ ቢታንቶ ዓኣ፥ ያኦዘሢኮ ሱንያ ዔያታ ጫሽኬኔ፤ ጎሞ ፔኤኮ
ቡኡፂ፥ ዒዛ ቦንቸያዋ ዔያታ ዒፂኔ።

10 ደንጋሳ ኪኢታንቻሢ ዑዠ ሳንጎይዳ ዓኣ ዑዠ ቦዓሢኮ
ካኣቱም ያይቶይዳ ላኣላዛ፥ ቦዓሢኮ ካኣቱማ ዲሚ ማዕኔ፤ ዓሳ
ኮሺ" ሜታዲ ሜታሢዳፓ ዔቁያና ዒንዲርዘ ፔኤኮ ዳዓኔ፤

11 ሐሃ ዔያቶኮ ሜታዲያና ኪፃዲያናይዳፓ ዔቁያና ጫሪንጮ
ያኦዘሢ ዔያታ ጫሽኬኔ፤ ዔያታ ማዴ፥ ዳቢንቶ ቡኡፂባኣሲ።

12 ላሃ"ሳ ኪኢታንቻሢ ዑዠ ሳንጎይዳ ዓኣ ዑዠ ዴኤፖ ዋር፥
ዔፕራፂሲይዳ ላኣላዛ ዓባ" ኬሰካ ዘላ"ፓ ሙካ ካኣቶ"ም ጎይሢ
ማዓንዳጉዲ ዋር ዋኦንታ ሚጩኔ።

13 ዴኤፖ ሸኦዮሢ ዳንጎና ቦዓሢ ዳንጎና ሃሃ ሉኡዙሞና ጾኦሲ
ማሊያ ኬኤዘዘንሢያ ማሊሳሢ ዳንጋፓ ፓንቆ ማላ፥ ሐይሃ ፑርታ ዓያና
ኬሰካንቴ ታ ዘጌኔ።

14 ዔያታ ዲማ ዓኪ ባኣዚ" ማዳ ፃላሃ ዒያናኬ፤ ዬንሢ ሐይሃ
ዒያናንሢ ቢያ ባኮ ዳንዳዓ ያኦዘሢኮ ዴኤፖ ኬሎ"ና ኬሰካንዳ
ያሎም ዓሶ ቡኩሳኒ ዓጮ" ካኣቶ" ቢያሢ ባንሢ ዓኣዳኔ።

15 «ታኣኒ ወሲጉዲ ዔፍቀንቴ ዩባንዳኔ፤ ካሎ" ማዑቀጉዲና ካሎ"ሞቀ ባሲ ዛጉቀጉዲ ጴጪ ፔኤኮ ማኣባሢ ካገሢ ባንጅ ዋዛ ዴንቃንዳኔ»

16 ዩንሢ ባንጅንሢ ባጮ" ካኣቶ" ቢያ ዔብሬ ባሶ ሙኡቸና ባርማጌዶኔ ጌይንታ ቤዘይዳ ቡኩሲ የሎም ገኢጊሼኔ።

17 ላንካሳ ኪኢታንቻሢ ዑኩ ባንጎይዳ ባኣ ዑኩ ዠባርይዳ ላኣላዛ፣ ጌኤዠ ማኣራ ባኣ ካኣቱሞ ቤዛገ፡- «ባካሪ ቢያ ባካ ማዲንቲ ኩሜኔ!» ጋባ ዴኤፒ ዑኡሲ ዋይዚንቴኔ።

18 ቢማ"ና ዜኤሊንሢ ዜኤሊንሢ፣ ዴኤፒ ዑኡሲያ ዋይዚንቴኔ፣ ጉጉንሢ ጉጉንሢ፣ ሃሃ ሳባኣ ሚርጌና ባጊዳ፤ ዩያጉዴ ሳባ ባጊዳሢ ባሲ ማዠንቴማገ ባርቃቃ ባጊዳ ቤቁባኣሴ።

19 ዴኤፖ ካታሜላ ሃይሃ ቤሲ ዴዲ ዴዲ ገቁንቴኔ፤ ሜሎ" ባጮ" ባሶ ካታማኣ ቢያ ደዔኔ፤ ጾኦፊ ዴኤፖ፣ ባብሎኔ ካታሜሎ ጳቁሢ ባዛኮ ዴኤፖ ዳጎ ዑኩ ኩንሃና ዑኩ ዑሽካንዳጉዲ ባዛም ቢንጌኔ።

20 ዋኣቃ ሳዛ" ባኣ ባጮ" ባኣዲ ባይቄኔ፤ ሃሃ ዴካ"ኣ ቢያ ባኣ ቤዛገ ባይቄኔ።

21 ዴኤሠማ ፔቴ" ዴኤፒ ዋንሢ ሹቸጉዴ ሻቸ ጫሪንጫገ ባሶይዳ ኬዴ"ኔ፤ ዩይ ባይዘም ዳኪንቴ ባካ ሚርጌ ካሪ ባይዚ ሜታሴያ ማዔሢር ባሳ ጾኦፊ ጫሽኬኔ።

17

ዘኣሰካ ኮኦማ ላኣሊ

1 ላንካዋ ዑኩ ባንጎ ዔኪ ባኣ፣ ላንካዋ ኪኢታንቻንሢገ ፔቴ"ይ ታ ባንሢ ሙካቃ ታኣም፡- «ሓኒ ሙኬ፤ ሚርጌ ዋኣቃ ዑፃ ዴዲ ባኣ፣ ዘኣዛ ኮኦማ ላኣሊሎም ባንጊንታንዳ ሜታሢ ታ ኔና ዳዋንዳኔ፤

2 ባጮ" ካኣታ" ባዛና ዋላ" ዘኣዛ ኮኦማ፤ ሃሃ ባጮ"ይዳ ናንጋ ባሳ ባዛኮ ዩያ ፑርቶ ሱኡኮ ማዲ" ዑኩና ማሢንቴኔ» ጌዔኔ።

3 ዩካገ ኪኢታንቻሢ ባንጅ ጌኤሺ ማሊያይዳ ታና ጌልዚ፣ ባሲ ናንጉቀ ዳውሎ" ዔኪ ባኣዴኔ፤ ባኣካ ጫሽ ዑፃይዳ ቢያ ፃኣፒንቲ

16:15 ማቴ. 24፣43-44፤ ሉቃ. 12፣30-40፤ ዮሐ. ፪፣፮ 3፣3። 16:16 2።ጴሌ. ባሃኬ 23፣29፤ ዛካ. 12፣11። 16:18 ዮሐ. ፪፣፮ 8፣5፤ 11፣13፤ 19። 16:19 ባሲ. 51፣17። 16:20 ዮሐ. ፪፣፮ 6፣14። 16:21 ኬሲ. ማፃ 9፣23፤ ዮሐ. ፪፣፮ 11፣19። 17:1 ዔር. 51፣13። 17:2 ባሲ. 23፣17፤ ዔር. 51፣7።

ዓኣ፣ ለንካይ ቶኦኪና ታጾ ጉራኒና ዓኣ፣ ዘቄ ቦየሰኬያኮ ዑፃ ዳዒ ዓኣ ፔቴ" ለአሊ ታ ዳንቄ።

4 ለአሊላ ጮልዔ ዲንኪ ማኣዖና ዘቄ ማኣዖና ማይንቲ ዓኣኔ፤ ጊንሣ ዋርቄና ዲማ ዲማ ሚዛጾ ሹጮና ፓልሚንቲ ዓኣኔ፤ ኩጮይዳ ሃሣ ዒዛ ሻኣካ ባኣዚ"ና ዒዛኮ ፑርቶ ሱኡኮ ማዶ"ና ኩሚያ፣ ዋርቄና ኮሺ"ንቲ ዑሺ ዓንጊ ዔኪ ዓኣኔ።

5 ዒዛኮ ባሊቶይዳ፡- «ዘኣዛ ኮኣማ ዓሶና ዓጮ"ይዳ ፑርቶ፣ ዒኢቲ ማዶ"ናኮ ዒንዶ ማዔ ዴኤፖ ካታሚሎ ባብሎኔ» ጌይንታያ ዓኣሺንታያ፣ ዔርቱዋ ሱ"ንሣ ፃኣፒንቲ ዓኣኔ።

6 ዬና ለአሊላ የእሴም ዲማዴ ዓሶኮ ሱጉያና ዬሱሰ ኪሪሰቶሴ ዘሎ" ማርካዳ ዓሶኮ ሱጉያና ማሢንቲ ዓኣንቲ ታ ዛጌኔ፤ ታ ዒዛ ዳንቃፖ ሚርጌና ዲቃቲ ሄርሼኔ።

7 ኪኢታንቻሣ ጋዓንቲ ታኣም፡- «ዓይሳር ኔ ዲቃቲ ሄርሻይ? ለአሊሎና ዒዛ ዳዒ ዓኣ፣ ለንካዎ ቶኦኮ"ና ታጾ ጉራኖና ዓኣ ቦዓሢናኮ ዓኣሺንታያ ማዔ ዔርቱዋ ባኮ ታ ኔኤም ጋፒሲ ኬኤዛንዳኔ፤

8 ኔኤኒ ዛጌ ቦዓሢ ቤርታ ዓኣያኬ፤ ሃሣ ጋዓንቲ ባኣሴ፤ ሃጊ ዴኤፖ፣ ዒጊቻ ዔቶይዳፓ ኬሰኪ ባይቆር ዓኣዳንዳኔ፤ ዒማ"ና ሳዓ ማዢንቲማፓ ዓርቃፖ ሱ"ንፃ ናንጎ ማፃኣፖይዳ ፃኣፒንቲባኣያ፣ ሳፖይዳ ናንጋ ዓሳ፡- ቦዓሢ ቤርታ ዓኣያ፤ ሃሣ ጋዓንቲ ባኣያ ጊንፃፓ ሙካንዳያታሣ ዛጋፖ ዲቃቲ ሄርሻንዳኔ።

9 «ዔሪ ማላ ዒኔና ዓኣያ ማዓኒ ኮይሳሣ ዒማ"ናኬ፤ ለአሊላ ዳዒ ዓኣ ቶኦኮ"ንሣ ለንካይ ዲካኬ፤

10 ዔያታ ለንካይ ካኣቶ"ኬ፤ ዔያቶይዳፓ ደንጋሣ ሎኦሚኔ፤ ፔቴ"ሣ ሃሣ ዓኣኔ፤ ባጋሣ ጋዓንቲ ሃጊ ሙኪባኣሴ፤ ዒ ሙካፖ ካኣታዲ ዳዓኒ ኮይሳሣ ዳካ" ዋይር ሌሊኬ።

11 ቤርታ ዓኣያ፣ ሃሣባኣ ቦዓሢ ሳላ"ሳ ካኣታ"ሣኬ፤ ዒዚ ለንካዎ ካኣቶ"ንሣፓ ፔቴ"ሣኬ፤ ዒዚያ ባይቆር ዓኣዳኔ።

12 «ኔኤኒ ዛጌ ታጾ ጉራና ሓጊ ካኣታዲባኣ፣ ታጾ ካኣቶ"ኬ፤ ጋዓንቲ ኮሺ" ዳካ" ዋይ ቦዓሢና ዋላ" ካኣታዳንዳ ቢታንቶ ዔያታ ዳንቃንዳኔ።

13 ዬንሣ ካኣቶ"ንሣኒኮ ማሊፃ ፔቴ"ኬ፤ ዔያታ ፔኤኮ ዋልቆና ቢታንቶና ቦዓሢም ዒንጋንዳኔ፤

17:3 የሐ. የፔዳ 13፣1። 17:4 ዒር. 51፣7። 17:8 ዳኣኔ. 7፣7፤ የሐ. የፔዳ 11፣7፤ ዓይኑ. 69፣28። 17:12 ዳኣኔ. 7፣24።

14 ይያታ ማራዳህና ዋላ" ያልታንዳኔ፤ ጋዓንቴ ማራዳህ ጎዳቶኮ ጎዳ ሃሃ ካኣቶ"ኮዋ ካኣቲ ማዕሚር ያሎና ዔያቶ ባሻንዳኔ፤ ዒዛና ዋላ" ዓኣ፣ ዔኤሌ "ንቴዘንሚንታ ዶኦሪንቴዘንሚንታ ሃሃ ጉሙርቁንታዘንሚያ ያሎና ባሻያ ማዓንዳኔ» ጌዔኔ።

15 ሐሃ ኪኢታንቻሚ ታኣም፡- «ዘኦዛ ኮኦማ ላኣሌላ ዴዒ ዓኣንቴ ኔ ዛጌ ዋኣ፣ ዴማ ዴማ ዜርሢ፣ ቶኦኪ፣ ዴሬ ሃሃ ዴማ ሙኡቹ ጌሰታ ዲቢ ዓሲኬ፤

16 ቦዓሚና ኔ ዛጌ ታጳ ጉራኖንሚና ዬኖ ዘኦዛ ኮኦማ ላኣሌሎ ዒዳ፣ ጉሪ ካሎ" ዒዛ ዓይሳንዳኔ፤ ዒዛኮ ባሽኮዋ ሙዒ፣ ታሚና ዒዛ ዔያታ ሚቻንዳኔ።

17 ያኦሲ ፔኤኮ ማሊያ ዔያታ ኩንሃንዳጉዲ ዬያ ዔያቶ ዒኖይዳ ጌሃኔ፤ ዓይጎር ጌዔቴ ያኦሲ ቃኣላ" ማዲንቴ ኩማንዳያ ሂላ"ንዳኣና ዔያታ ፔቴ" ማሊሢና ዋላ" ጌኢጊ፣ ዔያቶኮ ካኣቱሞ ቢታንቶ ቦዓሚሞ ዒንጋንዳጉዲኬ።

18 «ዬና ኔ ዛጌ ላኣሌላ ዓጮ" ካኣቶ" ዑፃ ካኣታዳንዳ፣ ዴኤፖ ካታሚሎኬ» ጌዔኔ።

18

ባብሎኔ ካታሞኮ ሎኦሚያ

1 ዬካፓ ሃሃ ዴኤፒ ቢታንቶ ዓኣ፣ ሜሌ" ኪኢታንቸሰኬይ ጫሪንጫፓ ኬዳ"ንዳቴ ታ ዛጌኔ፤ ዒዛኮ ቦንቸ ፖያ ሸኤሪፃፓ ዔቁያና ሳዓ ፖዔኔ፤

2 ዒዛ ዴኤፒ ዑኡሲና፡-
«ዴኤፖ፣ ባብሎኔ ካታሚላ ሎኦሚኔ! ሎኦሚኔ!
ፃላሄኮዋ ናንጊ ቤሲ ማዔኔ!
ሃሃ ፑርቶ ዓያኖኮዋ ዋይሢ ቤሲ ማዔኔ፤
ፑርታ ሃሃ ሻኣካያ ማዔ፣ ካፖኮ ቢያ
ዋይሢ ቤሲ ማዔኔ።

3 ዴራ" ቢያ ዒዛኮ
ፑርቶ ሱኡኮ ማደ" ዑኡ ዑሸኬኔ፤
ዓጮ" ካኣታ" ዒዛና ዋላ" ዘኦዛ ኮኦሚኔ፤
ሃሃ ዓጮ"ይዳ ኮርሞ ኮርማ ዓሳኣ
ዑሃ ዓኣዴ ዒዛ ሳኣ ናንጊሞ ጌኢጋያታሢር ያርጎጩኔ»
ጌዒ ዒላቴኔ።

4 ሐሃ ሚሌ" ዑኡሲ ጫሪንጫፓ፡-

18:2 ዒሲ. 13፣21፤ 21፣9፤ ዔር. 50፣39፤ 51፣8፤ የሐ. ያፔዳ 14፣8። 18:3 ዒሲ. 23፣17፤ ዔር. 51፣7።

«ታ ዴሬዮቴ! ዒዛ ማዳ ጎሞ ዒንሢ ማዲግጉዲ
ዒዛም ዓጎና ባይሲንቶና ዒንሢያ ባይቁግጉዲ፤
ዒዛይዳፓ ኬሰኩዋቴ።

5 ዓይጎር ጌዔቴ ጎማ ዒዛኮ ኩሊንቲ
ጫሪንጮ ሄሌ"ሢሮ

ያኦሲ ዒዛኮ ፑርቱሞ ጳቂሢሢሮኬ።

6 ዒዛ ዒንገማጉዲ ማሂ ዒንጉዋቴ፤
ዒዛ ማዴ ማዴ"ኮዋ ጳንጩ ዒዛም ማሁዋቴ፤

ዒዛ ሲኢሪ ዒንገ ዑኩ፣ ጳንጩ ማሂ
ሲኢሪ ዒዛም ዒንጉዋቴ።

7 ዒዛ ፔና ቦንቹሲ ሳኦ ናንገም ጊኢጋያ ማሂማጉዲ
ዒዛ ማታሲ ያዲሱዋቴ፤

ዒዛ ፔኤኮ ዒኖና፡-
ታኦኒ ካኦቲ ማዒ ዴዔኔ፤
ዒኒ ታኦኮ ሐይቆያቱዋሴ፤
ፔቴ"ታዖ ያዲያ ታ ያዲዋሴ»

ጌዒ ጌዒ ሄርሽንታኔ።

8 ዬያሮ ዒዛም ዓጎና ባይሲንታ
ፔቴ" ኬሊ" ዒዛ ሄላ"ንዳኔ፤
ሐይቢና ያዲሢና ናይዚና ዒዛ ሄላ"ንዳኔ፤
ዒዛይዳ ዋጋ ጎዳ ማዔ ያኦዛሢ ዴኤፒ ማዔሢሮ
ታሚና ዒዛ ሚቹንታንዳኔ»

ጋዓንቲ ታ ዋይዜኔ።

9 ዒዛና ዋላ" ዞኦዛ ኮኦሚ፣ ጊኢጋ ናንገ ናንጌ፣ ሳዖ ካኦታ"
ዒዛ ሚቹንታ ዋዶ"ና ኬሰካ ጩቦ" ዛጊ ዒዛር ዒላቲ ዒላቲ
ዬኤካንዳኔ።

10 ዔያታ ዒዛይዳ ሄሌ" ማታሢ ዛጎ ዒጊጩ፣ ሃኬ ዔቁ፡-
«ኔኤኒ ሐና" ዴኤፖ ካታሜሌ!
ኔኤኒ ሐና" ፑኤፒ ማዔ፣ ባብሎኔ!
ፑርቶ ዋጋ" ኔ ጊዳ" ዑኬና ሙኬሢሮ
ባዴዔ ኔና! ባዴዔ ኔና!»

ጋዓንዳኔ።

11 ዔያቶኮ ዋኦዖ ካኦሚላ ጫኦኔ ባኮ ሃካፓ ሴካ ሻንቃ ዓሲ
ባኦሢሮ፣ ሳዖይዳ ኮርሞ ኮርማ ዓሳ ዒዛ ዛሎ" ዬኤኪ ያያንዳኔ፤

18:4 ዒሲ. 48፡20፤ ዔር. 50፡8፤ 51፡6፤ 45። 18:5 ማዢ. ማፃ 18፡20-21፤
ዔር. 51፡9። 18:6 ዓይኪ. 137፡8፤ ዔር. 50፡29። 18:10 ሂዚ. 26፡16-17።
18:11 ሂዚ. 27፡31-36።

12 ዓይነት ዋና የካላሚሎይዳ ጨካኝ ባካ፡- ዋርቄ፣ ቢራ ዓንገ፣ ቦንቸንታ ሹቸ፣ ሚዛጲ ሹቸ፣ ቦኦሪ ሻካዣ ዓፒላ፣ ጮልዔ ዲንኪ ማኦ፣ ሱኡፔ ዓፒላ፣ ዘቄ ዓፒላ፣ ቃራ ሳውቃ ዲማ ዲማ ሚሢ፣ ዳርሲ ዓቸንታ ሚርጌ ሚኢሼ ዔካ ሚሢንታ ሞኦና ዓንገንታ ሜሌ" ዓንገንታ ቦኦሪ ሚዛጲ ሹጮንታይዳፓ ኮሺ "ንቲ ባካ ቢያ፡

13 ሳውቃ ሚሢ ቁኡሪ፣ ዲማ ዲማ ሳውቃ ዳኤሻ፣ ካርቤ፣ ቲሺ፣ ዑንጃ፣ ዋይኖ ዑዣ፣ ሪሚቶ ዛይታ፣ ሺኢቸ ዲኢሊ፣ ዛርጌ፣ ባይ፣ ማሪይ፣ ፓራ፣ ሳርጌላ ያይታ፣ ዬያጉዲ ሃሣ ዓይሎ" ማዔ ዓሶንታ ያሎና ዲዒ ዔኮና ዓሶንታኬ።

14 ዬንሢ ኮርሞ ኮርማዞንሢ፡- «ኔኤኒ ናሽካ ኮዣ ባካ ቢያ ኔ ጊዳ"ፓ ቤቲ፣ ዳንዳኔ፤ ኔኤኮ ያርጎቹሞና ፓልሞና ቢያ ባይቄኔ፤ ማይ ዬይ ባካ ኔኤሞ ገንሣ ጰዳዓኬ» ዒዞም ጋዓኔ።

15 ዬያ ባኮ ዒዞይዳፓ ሻንቄ ኮርሚ ያርጎጬ፣ ኮርማ ዓሳ ዒዞይዳ ሄሌ" ሜቶ" ዒጊጪሢሢና ሃኬ ዒዞኮ ዔቃንዳኔ፤ ሃሣ ዔይታ ዒዞ ዛሎ" ዬኤኪ ዬኤኪ ያያንዳኔ፤

16 ዑኡዞዋ ዔይታ ዳጊዲ፡- «ሻካዣ ዓፒሎንታ ዳንኮ ዘቄ ዓፒሎንታ ማይንታዞ ዋርቆና ሚዛጲ ሹጮና ፓልሚንቲዞ ዳኤፖ፣ ካታሜሎ ባብሎኔም ባዴዔ! ባዴዔ!

17 ዬይ ቆላ" ቢያ ኔጉዋዎ ኔኤኮ ባይቄባይ!» ጋዓንዳኔ። ዋኦ የካላሚሎኮ ሱኡጋ ቢያ፣ ዋኦ የካላሚሎ ቶጊ ዓኦዳ ዓሳ ቢያ፣ ዋኦ የካላሚሎይዳ ማዳ ዓሶንታ ባዞ" ዑፃ ሃንቲ ሃንቲ ኮርማ ዓሳ ቢያ ዒዞኮ ሃኬ ዔቃንዳኔ፤

18 ዒዞ ሚቸንታኦና ኬሰካ ጩቦ" ዛጋዎ፡- «ሃኖ ዳኤፖ ካታሜሎጉዴያ ሜሌ" ካታማ ዋካዳይ?» ጌይ ጌይ ዔይታ ዒላቲኔ።

19 ሃሣ ዔይታ ፔኤኮ ቶኦካ" ሲላሊ ዋሃ፣ ያዩ ዬኤኪ ዬኤኪ፡- «ባዞ"ይዳ ዋኦ የካላሚላ ዓኦ ዓሳ ቢያ ዒዞ ቆሎ"ና ያርጎጬ፣ ዓሳ ዳኤፖ ካታሜላ ዑኬና፣ ኔጉዋዎ ባይቄሢር ባዴዔ! ባዴዔ!

20 ጫሪንቸዮ! ዒዞ ባይቄሢር ዋዛዳ፤ ዒንሢ ጸኦሲም ዲማዳዞንሢና ጸኦሲ ማዳ"ም ዳኪንቲዞንሢሢ

18:13 ሂዚ. 27፣12፤ 13፤ 22። 18:15 ሂዚ. 27፣31፤ 36። 18:17 ዓ.ሲ. 23፣14፤ ሂዚ. 27፣26-30። 18:18 ሂዚ. 27፣32። 18:19 ሂዚ. 27፣30-34።

ሐሣ ያኦሲ ማሊያ ከኤዛዞንሢየኖ ዋዛዲዎቹ፤
ዓይጎር ጌዔቱ፡-

ያኦሲ ዒንሢዳ ዒዛ ሄሊ"ሴ ማቶ"ሮ ጌዒ
ዒዞ ፑርታና ዋጌኔ» ጌይ ጌይ ዒላቱኔ።

21 ዩካፓ ሃሣ ፔቱ" ዴኤፒ ከኢታንቻሰኪይ ፑኦፒ ዋንሢ
ሹቺጉዴ ሹቺ ዔኪ ባዞ"ይዳ ከኤራዎ፡- «ዴኤፖ ካታማላ፥ ባብሎኔ
ሐኦዲዲ ዋልቄና ከኤሪንታንዳኔ፤ ሐካፓ ሴካ ዒዛ ጴዳዓኬ፤

22 ጎኦሎ" ዋርቃ ዓሶንታ ዓይኑዋ ዓይናዳ ዓሶ ዑኡዛ

ሹሉንጎንታ ዛያሢንታ ዋርቃ ዓሶ ዑኡዛ
ላሚ ኔ ጌዳ" ማይ ዋይዚንታዓኬ፤

ዲማ ዲማ ባኦዚ" ሃኦማቶና ማዳ ዓይጎ ዓሲያ

ሃይፓ ሴካ ኔ ጌዳ" ጴዳዓኬ፤

ዋንሢ ዋዲንታያኦ ማይ ኔ ጌዳ" ዋይዚንታዓኬ።

23 ፖዓ፥ ፖዒያ ኔ ጌዳ"

ሐይፓ ሴካ ፖዓዓኬ፤

ዔፒ ሃይሴያ ሃይፓ ሴካ ኔ ጌዳ" ዋይዚንታዓኬ።

ኔ ዓጮ"ኮ ኮርሞ ኮርማ ዓሳ

ዓጮ" ቢያይዳ ዔርቱ ዴኤፖ ዓሶኬ፤

ኔኤኮ ማርሾና ዓሶ ቢያ ኔ ዳቢሼኔ።

24 ዒዞይዳ ያኦሲ ማሊያ ከኤዛዞንሢየንታ

ያኦሲም ዲማዴዞንሢየንታ

ሳይይዳ ዋዲንቱ ዓሶኮዋ ቢያ ሱጉፃ ጴዳኔ» ጌዔኔ።

19

1 ዩካፓ ሚርጌ ዓሲ ዑኡሲ ማላ፥ ዴኤፒ ዑኡሲ ጫሪንጮይዳ፡-
«ያኦሲም ጋላታ!

ዳቂሽሢና ቦንቾና ሃሣ ዋልቄያ ኑ ያኦዛሢሮ ማዔኔ፤

2 ዒዚ ዋጋ ዋጊፃ ጎኔ፤ ሃሣ ፒዜኬ።

ዘኦዛ ኮኦሚያና ሳዎ ዒኢሴ

ዘኦዛ ኮኦማ ዴኤፔሎ ፑርታና ዒ ዋጌኔ፤

ዒዞ ፑርታና ዋጊያና

ዒዞም ማዳ ዓሶኮ ሱጉፃ ማሃኔ፤

3 ላሚ ሃሣ

18:20 ላሚ. ዋማ 32፥43፤ ዔ.ር. 51፥48። 18:21 ዔ.ር. 51፥63-64፤ ሂዚ. 26፥21።

18:22 ሂዚ. 26፥13፤ ዔ.ሲ. 24፥8። 18:23 ዔ.ር. 7፥34፤ 25፥10። 18:24

ዔ.ር. 51፥49። 19:2 ላሚ. ዋማ 32፥43፤ 2ካኦቶ". ማ 9፥7።

ያኦሲም ጋላታ! ዒዛይዳፓ ጩባ" ናንጊና ጩቢ ጩቢ
ኬሰካኔ»

ጋዓ ዑኡሲ ታ ዋይዜኔ።

4 ዒማ"ና ለማታሚ" ያይዶ ጋርቾንሢና ያይዶ ባኮንሢ ካኦቱም
ያይታ" ዴዒ ዓኣ፣ ያኦዛሢም ባሊቶና ሳዖ ባንሢ ሂርኪ ጌይ፡-
«ዓኣሜን፤ ያኦሲም ጋላታ!» ጌዒ ጌዒ ዚጌኔ።

ማራዒሢኮ ዔፖ ሙዖ

5 ዬካፓ፡-

«ዒዛ ዒጊጩ፣ ዒዛም ማዳ
ዳኮ"ንታ ዴኤፖንታ ቢያ
ኑ ያኦዛሢ ጋላቱዋቱ!»

ጋዓ ዑኡሲ ካኦቱም ያይታ" ዓኣ ቤዛፓ ዋይዚንቴኔ።

6 ሃሣ ጊንሣ ማርጌ ዓሲ ዑኡሲ፣ ዴኤፒ ዋታ" ዋርዚ ዋኣሢና
ዴኤፒ ጉጉንሢ ዑኡሲ ማላ ዑኡሲ፡-
«ቢያ ባኣዚ" ዳንዳዓ ጎዳ ማዔ ያኦዛሢ
ካኣታዴሢ ጋላቱዋቱ!

7 ማራዒሢኮ ዔፓ ሄሌ"ሢሮ
ዒዛኮ ዑኡቴላ ጊኢጊንቴሢሮ

ዋዛ ኑም ማዖንጎ፣ ኑ ዋዛደም፤
ቦንቲያ ዒዛ ኑ ቦንቸም።

8 ዓኣፒዳ ዴካያ፣ ጌኤሺ ማዔ
ሻኣዦ ዓፒላ ማይንታጎዳጉዲ ዒዛም ዒንጊንቴኔ፤

ዬይ ቦኦሬ ሻኣዦ ዓፒላ ያኦሲም ዴማዴ ዓሶኮ
ዲሎ"ም ማዶ"ኬ» ጋዓንቴ ታ ዋይዜኔ።

9 ኪኢታጎቻሢ ሃሣ፡- « ማራዒሢኮ ዔፖ ሙዖም ዔኤሊ"ንቴ
ዓሳ ባሊቶና ዓኣያኬ» ጌይ ፃኣፔ» ታኣም ጌዔኔ፤ ሄሊ"ሳዖ ሃሣ፡-
«ሓይ ያኦሲኮ ጎኔ ቃኣላኬ» ጌዔኔ።

10 ታኣኒ ዬያ ኪኢታጎቻሢም ዚጋጋ ዒዛ ቶኮ ዴማ" ባሊቶና
ሂርኪ ጋዓዛ፣ ዒዚ ጋዓንቴ፡- «ሃሺ"! ሓያይዲፖ! ታኣኒያ ኔናንታ
ዬሱሴ ዛሎ" ማርካዳ ዒሾንሢንታ ዋላ" ማማዳያኬ፤ ያኦሲም
ዚጌ።

«ዬሱሴ ፔጋሲ ጳዌ ጎኑማ ያኦሲ ማሊያ ኬኤዛ ዓሶ ዳንጎና
ኬኤዛ ዓያኖኬ» ጌዔኔ።

ቦኦሬ ፓራሢ ቶጊ ዓኣ ዒሢ

19:3 ዒሲ. 34፣10። 19:5 ዓይኑ. 115፣13። 19:6 ሂዚ. 1፣24፤ ዓይኑ. 93፣1፤
97፣1፤ 99፣1። 19:9 ማቴ. 22፣2-3።

11 ዬካፓ ጩሪንጩ ቡሊ"ንቴም፥ ዒኢካ ቦኦሬ ፓር ታ ዳንቄኔ፤ ፓራሢ ቶጌሢ፡- «ጉሙርቁንታያ ሃሣ ጎኔ ዓሲ» ጌይንታያኬ፤ ዒዚ ዪሉ"ሞና ዋጋያ ሃሣ ያልታያኬ።

12 ዓኣፓ ዒዛኮ ዔኤታ ታሚ ማላኔ፤ ሃሣ ዒዛኮ ቶኦኮ"ይዳ ቦንቾሮ ዓጎ ባካ ሚርጌ ዓገንቲ ዓኣኔ፤ ዒዛይዳፓ ዓታዛ ማሌ" ያኦኢያ ዔሩዋያ፥ ያኣፒንቴ ሱንሢ ዒዛይዳ ዓኣኔ፤

13 ዒዚ ሱጉሢ ሄሊ" ፑርቲሴ ማኦያ ማይንቲ ዓኣኔ፤ ዒዛኮ ሱንፃ «ያኦሲ ቃኣላ» ጌይንታያኬ።

14 ዒማ"ና ቦኦሬ ፓር ቶጌ፥ ቦኦሬ ጌኤሺ ዓፒላ ማይንቴ፥ ጩሪንጩ ዓኣ ያሎ ዓጎ ዒዛ ገንያ ዓኣዳኔ፤

15 ማሌ" ዴሮ" ያሊ ባሻንዳ ዓጩ፥ ጩንቻ ዓፓሮ ዒዛኮ ዳንጋፓ ኬሰኬኔ፤ ዒዚ ሚጩንቲዋያ ሄርቄ ዔያቶ ዋይሣንዳኔ፤ ሃሣ ዒዚ ቢያ ባኣዚ" ዳንዳዓ ያኦዛሢኮ ዴኤፖ ዳጎና ዋይሮ ሄርቄ ጩኤጶ ቤዛ ዋይሮ ሄርቃንዳኔ፤

16 ዒዛኮ ማኣዓሢና ጉባዘ"ናይዳ፡- «ካኣቶ"ኮ ካኣቲ፥ ጎዳቶኮ ጎዳ» ጋዓ ሱንሢ ያኣፒንቲ ዓኣኔ።

17 ዬካፓ ሃሣ ፔቴ" ያኦሲኮ ኪኢታንቻ ዓቦ" ዑፃ ዔቄ ዓኣንቴ ታ ዛጌኔ፤ ዒዚ ጩሪንጩይዳ ባራና ካፖም ዴኤፒ ዑኡሲና፡- «ያኦሲ ገኢገሺ፥ ዴኤፖ ሙያ ሙዓኒ ቡኪንቲዋቴ፤

18 ዒንሢ ቡኪንታሢ ካኣቶ" ዓሽኮ፥ ፖኦሊሶ ዓይሣ ዓሶ ዓሽኮ፥ ያሎ ያላ ደደ ዓሶ ዓሽኮ፥ ፓራሢ ቶጌ ያላ ዓሶና ፓራሢና ዓሽኮ፥ ዋይሣ ዓሶና ዴማ" ማዒ ዋርቃ ዓሶናኮ ዓሽኮ፥ ዳኮ" ዓሶና ዴኤፖ ዓሶና ዓሽኮ፤ ዬያጉዲ ዓሲ ቢያኮ ዓሽኮ ሙዓኒኬ» ጌይ ዒላቴኔ።

19 ሐሣ ቦዓሢንታ ሳያ ካኣቶ"ንታ ፔኤኮ ያላ ዓሶና ዋላ" ቦኦሬ ፓራሢ ቶጌሢና ዒዛኮ ያላ ዓሶና ያልታኒ ቡኪንቲ ዓኣንቴ ታ ዛጌኔ፤

20 ጋዓንቴ ቦዓሢ ዓዲንቴኔ፤ ሃሣ ዒዛና ዋላ" ዒዛ ቤርታ ዴማ ዲማ ዓኪ ባኣዚ" ማዳ፥ ሉኡዙሞና ያኦሲ ማሊያ ኬኤዛሢያ ዓዲንቴኔ፤ ዒዚ ቦዓሢ ማላቶ ዔኪ ዓኣዘንሢና ዬያም ዚጋዘንሢ ዴማ ዴማ ዓኪ ባኣዚ" ማዲ ዳዋሢና ዳቢሻኔ፤ ዒማ"ና ዬንሢ ላምዖንሢ ሽምፔና ዓኣ ጎይሣ ዓኣንቴ ዔኤታ ታሞ ባዘ"ይዳ ዓገንቴኔ።

21 ዓቴዘንሢ ሃሣ ቦኦሬ ፓራሢ ቶጌ ዓሢኮ ዳንጋፓ ኬሰካ፥ ጩንቻ ዓፓራ ዋዴኔ፤ ዒማ"ና ካፓ ቢያ ዓሽኮ ዔያቶኮ ሙይ ሚሽኬኔ።

19:11 ሂዚ. 1፥1፤ ዓይኑ. 96፥13፤ ዒሲ. 11፥4። 19:12 ዳኣኔ. 10፥6። 19:15 ዓይኑ. 2፥9፤ ዒሲ. 63፥3፤ ዒዮ. 3፥13፤ ዮሐ. ያፔጳ 14፥20። 19:20 ዮሐ. ያፔጳ 13፥1-18።

20

ሺዮ ሌዎ ካኦታደንደ ካኦቱሞ

1 ዩካፓ ሃሃ ጴሌፖ፣ ዲጊቻ ዔቶ ካሮ" ቡሎ" ቁልፔና ጴሌፒ ካኒ ቢራታና ዔኪ ዓኣ፣ ኪኢታንቸሰኬይ ጫሪንጫፓ ኬዳ"ንቴ ታ ዛጌኔ፤

2 ዒዚ፡ ጴሌፖ ሾኦካሃሂ ዓርቂ ሺያ ሌዔ ቱኬ"ኔ፤ ዩይ ጴሌፖ ሾኦካሃሂ ዲያብሎስ፣ ሃሃ ጊንሃ ፃላሂ ጌይንቴ ቤርታኦ ሾኦካሃሂኬ፤

3 ዩይ ሺዮ ሌዎ ጋፓንዳያ ሄላ"ንዳኣና ማይ ዴሮ" ደቢሹሞጉዲ ያኦሲኮ ኪኢታንቸሃሂ ዒዛ ጴሌፖ ዲጊቻ ዔታ" ዓጊ፣ ካሮ" ያኦኒያ ቡሎ"ሞጉዲ ዔርዛ ማላቶና ዓይሄኔ፤ ጋዓንቴ ዩካፓ ዳካ" ሞዴም ዒ ቡሊ"ንታንዳያ ኮይሳኔ።

4 ዩካፓ ካኦታ" ዴዓ ሚርጌ ያይታ ታ ዴንቄኔ፤ ዩና ያይቶይዳ ሞጌ ሞጋኒ ቢታንቶ ዲንጊንቴ ዓሲ ዴዒ ዴዒ ዓኣንቴ ታ ዛጌኔ፤ ሃሃ ዩሱሴ ዛሎ"ና ያኦሲ ቃኦሎ" ኬኤዜሃሂ ዛሎ"ናሮ ጩንቸ ዓፓሮና ሞደና ዓሶኮ ሾምፓሂ ታ ዴንቄኔ፤ ዔያታ ቦዓሂና ዒዛኮ ማላቶናም ዘጊባኣያ ሃሃ ዩያ ማላቶ ባሊታ ማዔቴያ ኩጫ ጌሂባኣ ዓሶኬ፤ ዔያታ ሓይባ"ፓ ዔቂ ኪሪሰቶሴና ሞላ" ሺያ ሌዔ ካኦታዳንዳ።

5 ዓቴ" ሓይቄ ዓሳ ጋዓንቴ ዩይ ሺዮ ሌዎ ጋፓንዳያ ሄላ"ንዳኣና ሃይባ"ፓ ዔቂባኣሴ። ዩና ቤርታሳ ሃይባ"ፓ ዔቂያኬ።

6 ቤርታሳ ሓይባ"ፓ ዔቂያ ዔቂያ ዔቂያዜንሂኮ ዓንጆ ሞዛ ዓኣያ፣ ሃሃ ያኦሲማኦ ዔያታ ዲማዴያኬ፤ ላምዓሳ ሓይባ" ዔያቶ ሞኦታንዳ ባኦዚ"ያ ባኦሴ፤ ዔያታ ያኦሲና ኪሪሰቶሴናኮ ማዳ ቄኤሶ ማዒ፣ ኪሪሰቶሴና ሞላ" ሺያ ሌዔ ካኦታዳንዳ።

ፃላሄኮ ያሎና ባሺንቴያ

7 ዩና ሺዮ ሌዎ ጋፔሂኮ ጊንፃ ፃላሂ ቱኤዛፓ ቡሊ"ንታንዳ፤

8 ዩካፓ ዒ ዓጮ" ቢያይዳ ዓኣ፣ ጎኦጌና ማኦጎኦጌ ጌይንታ ዴሮ" ደቢሹ ያልዚሮሞ ዔያቶ ዔኪ ኬሰካንዳ፤ ዩያ ዴሮ"ኮ ፓይዳ" ባዘ" ዓጫ ዓኦ ማኦሻሎጉዲኬ።

9 ዔያታ ዓጮ" ቢያ ኬሰኪ ዴንዳዎ ያኦሲም ዲማዴ ዓሳ ናንጋ ጉርዶና ዒዚ ናሽካ ካታሜሎሞ ማንጌኔ፤ ጋዓንቴ ጫሪንጫፓ ታሚ ኬዲ" ዔያቶ ሙዔኔ።

10 ዔያቶ ደቢሹ ፃላሄና ቦዓሂና ሃሃ ሉኡዙሞና ያኦሲ ማሊያ ኬኤዛያ ማላሂ ዓኦ ቤዘ፣ ያኢሎ" ኬሰኪ ዔኤታ ታሞ ባዘ"ይዳ

ዔያታ ዓገንገቴን፤ ዒኢካ ዔያታ ዋንቶንታ ርኦርንታ ናንገና ጋፑዋ ሜቶ ናንገ ናንጋንዳኔ።

ጋፒንጾ ዋጎ

11 ዬካፓ ቦኦሬ፣ ዴኤፒ፣ ካኦቱዋ ያይታና ዬያ ያይቶይዳ ዴዒ ዓኣ ዓሲ ታ ዴንቄኔ፤ ዒሚ"ና ሳጾና ጨሪንጮና ዒዛ ቤርታፓ

ዓኣሺንገቴን፤ ቤሲያ ዔያቶኮ ዴዲባኣሴ፤

12 ዴኤፖንታ ዳኮ"ንታ ማዔ፣ ሓይቄ ዓሳ ካኦቱዋ ያይቶ ቤርታ ዔቂ ዓኣንገቴ ታ ዛጌኔ፤ ዒሚ"ና ማጻኦፔ ቡሊ"ንገቴን፤ ሜሌ" ናንገ ማጻኦፔ ማዔ፣ ማጻኦፔና ቡሊ"ንገቴን፤ ሓይቄ ዓሳ ዒሚ"ና ማጻኦፔፖይዳ ጻኦፒንገቴ ዓኣ፣ ፔኤኮ ማዶ" ጎይጾ ዋጎ ዔኬኔ።

13 ባዘ"ይዳ ጌሊ ሙይንገቴ ሓይቄ ዓሳ ባዘ" ኬሲ" ዒንጌኔ፤ ሓይባንታ ሃይቄ ዓሳ ናንጋ ቤዘንታ ዔያቶ ኮይላ" ዓኣ ሓይቄ ዓሳ ኬሲ" ኬሲ" ዒንጌኔ፤ ዬያይዲ ፔቴ" ፔቴ" ዓሳ ፔኤኮ ማዶ" ጎይጾ ዋጎ ዔኬኔ።

14 ዬካፓ ሓይባንታ ሓይቄ ዓሳ ናንጋ ቤዘንታ ታሞ ባዘ"ይዳ ዓገንገቴን፤ ዬይ ታሞ ባዘ" ላምዓሳ ሓይባኬ፤

15 ሱ"ንጻ ናንጎ ማጻኦፔ ጻኦፒንገቴ ዴዲባኣሢ ቢያ ታሞ ባዘ"ይዳ ዓገንገቴን።

21

ዓኪ ጨሪንቸና ዓኪ ሳዓና

1 ዬካፓ ዓኪ ጨሪንቸና ዓኪ ሳዓና ታ ዛጌኔ፤ ዋይቲ ጌዔቴ ቤርታኣ ጨሪንጮና ቤርታኣ ሳጾና ባይቄሢሮኬ፤ ባዘ"ያ ባኣያ ማዔኔ።

2 ያኦሲም ዲማዴ ካታሚላ፣ ዓኮ ዬሩሳላሜ ዓኒም ሎዓኒ ፓልሚ፣ ገኢገንገቴያ ማዒ ያኦሲ ኮይሎ ጨሪንጮፓ ኬዳ"ንገቴ ታ ዛጌኔ፤

3 ካኦቱዋ ያይታ" ዓኣ ቤዛፓ፡- «ያኦሲኮ ዋይጾ ቤዛ ዓሶ ባኣካኬ፤ ዒዚያ ዔያቶና ዋላ" ናንጋንዳኔ፤ ዔያታ ዒዛ ዓሲ ማዓንዳኔ፤ ያኦሲ ፔ ቶኦኪና ዔያቶና ዋላ" ማዓንዳኔ፤ ያኦዛሢያ ዔያቶኮ ዒዛ ማዓንዳኔ፤

4 ሓሣ ዓቢያ ቢያ ዔያቶኮ ዓኣፓፓ ዒ ዑጫንዳኔ፤ ሓይቢ ማዔቴያ ያይሢ፣ ዬኤፒ ማዔቴያ ሚታ ማይ ዔያቶኮ ባኣሴ፤ ዓይጎር ጌዔቴ ቤርታኣ ባካ ቢያ ዓኣዴኔ» ዴኤፒ ዑኡሲና ጋዓንገቴ ታ ዋይዜኔ።

20:12 ዳኣኔ. 7፣9-10። 21:1 ዒሲ. 65፣17፤ 66፣22፤ 2ጴይ. 3፣13። 21:2 ዒሲ. 52፣1፤ 61፣10፤ የሐ. ያፕዳ 3፣12። 21:3 ሂዚ. 37፣27፤ ሌዊ. ዓኬ 26፣11-12። 21:4 ዒሲ. 25፣8፤ 35፣10፤ 65፣19።

5 ዓመትና ካካቱም ያይቶይዳ ደዌህ:- «ዓካሪ፡ ታ ቢያ ባኮ ባካሳንዳኔ» ጌዌኔ፤ ዩካፓ ሃሃ:- «ሐይ ቃኣላ" ጉሙርቁንታያ፤ ጊንሃ ጎኔ ማዌህሮ ፃኣፔ» ታኣም ጌዌኔ።

6 ሃሃ ዒዚ:- «ዓካሪ ቢያ ባካ ጋፔኔ! ዌኔቢኮ ቢያ ዓርቃህና ጋፒሳህና ታናኩ፤ ዳኔቢንቱህም ናንጎ ዋኣጆይዳፓ ጨጎ ባኣዚ" ባኣንቱ፡ ጉሪ ታ ዒንጋንዳኔ፤

7 ያሎና ባሼህ ዬያ ቢያ ዳንቃንዳኔ፤ ታ ዒዛኮ ያኣሲ ማዓንዳኔ፤ ዒ ታኣኮ ናያ ማዓንዳኔ፤

8 ጋዓንቱ ዒጊጫ ዓሳ፡ ጉሙርቁዋ ዓሳ፡ ዒኢቱያ ማዌ ፑርቶ ዓሳ፡ ዓሶ ዋዳ ዓሳ፡ ማቾ ሃሃ ዓኒ ማዒባኣያና ላሃ ዓሳ፡ ማርሾ ማርሻ ዓሳ፡ ሜሌ" ያኦዞ ካኣሽካ ዓሶንታ ሉኡቃ ዓሶንታኮ ቢያ ዌያታ ጌላንዳ ቤዛ ጂኢሊ" ኬሰኪ ዌኔታ ታሞ ባዘ"ይዳኬ፤ ዬይያ:- ላምዓሳ ሐይቦ"ኬ» ታኣም ጌዌኔ።

ዓኮ ዬሩሳላሜ

9 ጋፒንህ ማዌ፡ ባይዛ ባኮ ላንካዎንህ ኩንሃና ላንካዎ ዑዠ ዓንጎ ዌኪ ዓኣ ላንካዎ ኪኢታንቾንህዳፓ ፔቴ"ህ ታ ኮይላ" ሙካዎ:- «ማራዓህኮ ማቾ ማዓ፡ ዑኡቴሎ ታ ኔና ዳዋንዳኔ» ጌዌኔ።

10 ዓያና ጌኤሽ ማለህ ጋር ታኣኒ ጌሊ ዓኣንቱ ዒዚ ፔቴ"፡ ዳኔፒ ደካ ታና ዌኪ ዓኣዳዎ ያኣሲም ደማዳ፡ ዬሩሳላሜ ካታሜላ ያኣሲ ኮይሎ፡ ጫሪንጫፓ ኬዳ"ያ ታና ዳዌኔ፤

11 ያኣሲኮ ቦንቻ ዒዞም ፖዓኔ፤ ዒዞኮ ፖዓ ማርጌና ማዛጳያ ማዌ፡ ዒያሰጲዳ ጌይንታ ሹጮጉዲ ኮሺ" ፖዓያ፤ ሃሃ ጌኤሽ ሌማሌኤሽጉዲ ፖዓያኬ፤

12 ታጳ ላምዎ ጌሎ ካራ ዓኣ፡ ዳኔፒ ሃሃ ሹቸና ኬልቆና ዳ"ጌ ኬኤሌ" ዲህ ዒዞኮ ዓኣኔ፤ ዬኖ ታጳ ላምዎ ጌሎ ካሮ"ይዳ ታጳ ላምዎ ኪኢታንቻ ዌቂ ዓኣኔ፤ ዒኢካ ሃሃ ታጳ ላምዎ ዒሰራዌኤሌ ፃጳ ሱንፃ ፃኣፒንቲ ዓኣኔ።

13 ዓባ" ኬሰካ ዛሎ"ና ሃይሃ ካራ፡ ኬዶ" ዛሎ"ና ሃይሃ፡ ዳኣሎ" ዛሎ"ና ሃይሃ፡ ዓባ" ጌላ ዛሎ"ና ሃይሃ ካራ ዓኣኔ።

14 ካታሜሎ ሹጮና ኬልቂ፡ ዲርቆና ዲያኮ ደዲሻኒ ደማ" ጌህ ማኸና ታጳ ላምዎ ሹቸ ዓኣኔ፤ ዬያቶ ዑጆይዳ ማራዓህ ማዳ"ም ደኪንቱ፡ ታጳ ላምዎንህኮ ሱንፃ ፃኣፒንቲ ዓኣኔ፤

21:6 ዒሲ. 55፡1። 21:7 2ሳሙ. 7፡14፤ ዓይኑ. 89፡26-27። 21:10 ሂዚ. 40፡2። 21:13 ሂዚ. 48፡30-35።

15 ዲሞና ታኦና ገሰታ ከኢታንቻሢ ካታሞንታ ካታሞኮ ገሎ ካሮንታ ሹጮና ኬልቂ ዲርቆና ዲያሞ ሞርቆ፣ ሞርቆና ኮሺንገቴ ያደሲ ዓንገ ኮኦሎ" ዔኪ ዓኣኔ፤

16 ካታሚሎኮ ያደሱሞና ዳልጉሞና ያይዶ ዛሎ"ና ቢያ ሄኮ ማዔያከ፤ ከኢታንቻሢ ካታሚሎ ዬኖ ዓንገሎና ሞርቆዛ ዒዛኮ ያደሱማ ታጾ ላምዎ ሺያ ሚራፔ * ማዔኔ፤ ዒዛኮ ዳልጉሞና ዔጾና ዬኖ ጎይፆ ማዔኔ፤

17 ከኢታንቻሢ ሹጮና ኬልቂ ዲርቆና ዲያ ሞርቆኔ፤ ሞርቆዛ ያደሱማ ከኢታንቻሢ ሞርቆ፣ ዔርቴ ሞርቆ ባኮና ጃኤታና ያይዲታሚ" ያይዶ ሞዳ ማዔኔ።

18 ዬይ ኮሾ"ና ኬኤሎ" ዲራ፣ ዒያሰጲዴ ሹጮና ኮሾ"ናያከ፤ ካታሚላ ለማሌኤሹጉዴ ገኤሺ ሞርቆና ማዦናያከ፤

19 ካታሚሎኮ ኬኤሎ" ዲያ ደዲሻንዳጉዲ ዴማ" ጌሢ ማዦና ሹጮ ዲማ ዲማ ሹጮና ቢያ ማይሊ ገኢገሻናያከ፤ ቤርታሲ ዒያሰጲዴ፣ ላምዓሶ ሴንፔሬ፣ ሃይሣሶ ኬልቂዶኔ፣ ያይዳሶ ሜራገዴ፤

20 ደንጋሶ ሴርዴንክሴ፣ ላሃ"ሶ ሴርዲዮኔ፣ ላንካሶ ከሪሰቶሎቤ፣ ሳላ"ሶ ቢሬሌ፣ ታዘጸሶ ዌራዊሬ፣ ታጸሶ ከሪሰጲራሲሴ፣ ታጾ ፔታ"ሶ ያከንቴ፣ ታጾ ላምዓሶ ዓሜቴሰጂር ጌይንታ ሹጮ ጌሢ ማዦናያከ።

21 ታጾ ላምዎ ካሮ"ይዳ ታጾ ላምዎ ሚዛጲ ሹቺ ዓኣኔ፤ ፔቴ" ፔቴ" ካራ" ፔቴ" ፔቴ" ሚዛጲ ሹቺና ማዦናያከ፤ ካታሚሎኮ ሳዞ" ዴኤፖ ጎይፆ ለማሌኤሹጉዴ ፖዓ፣ ገኤሺ ሞርቆና ኮሾ"ናያከ።

22 ቢያ ባኣዚ" ዳንዳዓ ጎዳ ማዔ ያኦዛሢና ማራዓሢና ዬኖ ካታሚሎኮ ገኤኮ ማኣሮ ማዔሢሮ ካታሞይዳ ገኤሺ ማኣሪ ታ ዴንቂባኣሴ።

23 ያኦሲኮ ቦንቾ ፖዓ፣ ዒዞም ፖዓሢሮና ሐሣ ማራዓሢያ ዒዞኮ ፖዓሢ ማዔሢሮ ካታሚሎም ዓቢያ ማዎም ዓገኒያ ፖዓንዳጉዲ ኮይሱሞሴ።

24 ዴራ" ዒዞ ፖሮና ሃንታንዳኔ፤ ሐሣ ዓጮ" ካኣታ" ፔኤኮ ዓኣ ባኮ ዒዞ ባንሢ ዔኪ ዬዓንዳኔ።

21:15 ሄዚ. 40፣3። * 21:16 ሚራፔ፡- ጌይፆ ሚናኣ ሞዶ"ና ዔኤቢኮ ያደሱሞንታ ዳልጉሞንታ ዔጲንታ ሞርቆ ዔርያ ማዓዛ ፔቴ" ሚራፔ" ፔቴ" ጃኤታና ሳሊ"ታሚ" ደንጎ ታኣከሢ ማዓያከ። 21:18 ዒሲ. 54፣11-12። 21:23 ዒሲ. 60፣19-20። 21:24 ዒሲ. 60፣3።

25 ዲኢካ ጳጳሪ ባኢያታሢሮ ካታሜሎኮ ካራ" ቢያ ዎዴ
ዎዴንቱዎዎ ዴዓኔ።

26 ዴሮ"ኮ ዓኣ ባካ ቢያ ዲዞ ጋሮ ጌላንዳኔ፤

27 ፑርታ፡ ሻኣካ ባኣዚ" ማዔያ ፔቴ"ታዎ ዲዞ ካታሜሎ
ጌላዓከ፤ ሃሃ ፔና ዲኢሳ ማዶ ማዶያና ሉኡቃ ዓሲ ፔቴ"ታዎ ዲኢካ
ጌላዓከ፤ ዲኢካ ጌላንዳዞንሢ ሱንፃ ማራዓሢኮ ናንጎ ማፃኣፖይዳ
ፃኣፒንቱዞንሢ ሌሊከ።

22

1 ዬካፓ ኪኢታንቻሢ ያኦሲና ማራዓሢናኮ ካኣቱሞ ያይቶይዳፓ
ኬሰካ፡ ጌኤሺ ለማሌኤሽጉዲ ጌኤሽካ ናንጊ ዎኣሢ ዎርዚ ታና
ዳዌኔ፤

2 ዬይ ዎራሢ ካታሜሎኮ ሳዛ" ዓኣ ዴኤፖ ጎይያ ጌዴና
ዓኣዳያከ፤ ዎሮኮ ሻውሎና ሚዛቆናይዳ ዓጊና ዓጊና ዓኣፒ ዓኣፓያ፡
ለዎይዳ ታጶ ላምዒ ማይንቱ ዓኣፓ ናንጊ ሚሢ ዓኣኔ፤ ዬያ
ሚፃሢኮ ዲላዣ ዴሮ"ኮ ዴኤሻከ፤

3 ሓይካፓ ሴካ ማይ ጋዳማ ባኣያ ማዓንዳኔ፤ ያኦሲና
ማራዓሢናኮ ካኣቱሞ ያይታ ካታሜሎይዳ ማዓንዳኔ፤ ዲዞም
ማዳዞንሢያ ዲዞ ካኣሽካንዳኔ፤

4 ዲዞኮ ዓውካሮዎ ዔያታ ዛጋንዳኔ፤ ዲዞኮ ሱንፃኣ ዔያቶኮ
ባሊታ ፃኣፒንቱያ ማዓንዳኔ፤

5 ዬካፓ ሴካ ጳጳሪያ ዳማዓ፤ ናንጊና ናንጋ ጎዳ ማዔ ያኣዛሢ
ዔያቶም ፖዓንዳሢሮ ፖዒ ፖዓ ባኣዚ"ታቴያ ዓቢያ ዔያቶም
ኮይሱዎያከ፤ ናንጊና ዔያታ ካኣታዴ ጎይሢ ናንጋንዳኔ።

ዬሱሴኮ ማዒ ሙኪያ ዛላ

6 ዬካፓ ሃሃ ኪኢታንቻሢ፡- «ሃንሢ ጌይንቱ ባኮንሢ
ጉሙርቂንታያ ሃሃ ጎኔከ፤ ፔ ዓያኖ ዲዞ ማሊያ ከኤዛ ዓሰም ዲንጋ
ጎዳ ማዔ ያኣዛሢ ዳካ" ዎዴኮ ጊንፃፓ ማዓንዳ ባኮ ዲዞም
ማዳዞንሢም ፔጋሲ ጳጳሪ ፔኤኮ ኪኢታንቻሢ ዳከኔ» ታኣም
ጌዔኔ።

7 ዬሱሴ ታኣም ከኤዛያ፡- «ታ ዑከና ዬዓንዳኔ፤ ሐኖ
ማፃኣፖይዳ ከኤዚንቱ ያኦሲ ማሊያ ካፒ፡ ማዶ ኩንሣሢ ዓንጀ
ዎዛ ዴንቃንዳኔ» ጌዔኔ።

21:26 ዓ.ሲ. 60፡11። 21:27 ዓ.ሲ. 52፡1፤ ሂዚ. 44፡9። 22:1 ሂዚ. 47፡1፤
ዛካ. 14፡8። 22:2 ማኸ. ማፃ 2፡9፤ ሂዚ. 47፡12። 22:3 ዛካ. 14፡11።
22:5 ዓ.ሲ. 60፡19፤ ዳኣኔ. 7፡18።

8 ሐያ ባኮ ዋይዜህና ዛጌህ ታና ዮሐንስኬ፤ ዩንህ ታ ዋይዛየ ሐህ ዛጋየ ዩንህ ባኮንህ ታኣም ጳዌ ከኢታንቻህም ዚጋኒ ዒዛኮ ቶኮ ዴማ" ሎኦሜኔ።

9 ከኢታንቻህ ጋዓንቴ፡- «ሐሼ"! ሐያይዲፕ! ታኣኒ ኔናንታ ኔኤኮ ጌርሲንህንታ ማዔ፤ ጾኦሲ ማሊያ ከኤዛዘንህና ዋላ"፤ ሃህ ሐያ ማፃኣፓ ጌይንቴ ባኮ ካፓዘንህና ዋላ" ማማዳያከ፤ ጾኦሲም ዘጊ ካኣሽከ» ታኣም ጌዔኔ።

10 ሐህ ዒዚ ከኤዛየ፡- «ቢያ ባካ ማዳንቴ ኩማንዳ ዋዳ" ዑከያ ማዔህረ ሐያ ማፃኣፖይዳ ጾኦሲ ማሊያና ከኤዚንቴ ባኮ ዓሲም ዔርቱዋጉዲ ዓኣቺፖ፤

11 ዓካሪ፡ ፑርቶ ማዳህ ፑርቶ ማማዳንጎ፤ ፔና ዒኢሳ ባኣዚ" ማዳህያ ማማዳንጎ፤ ዲላ"ህያ ዲዲሎ"ንጎ፤ ጾኦሲም ዲማዳህያ ፔና ዲዲማሶንጎ» ጌዔኔ።

12 ዩሱሴ ዒማ"ና ታኣም፡- «ታኣኒ ዑከ ዩዓንዳኔ፤ ፔቴ" ፔቴ"ህም ፔ ማዳ"ጉዴያ ታ ዒንጋንዳ ባካ ታ ኮይላ" ዓኣኔ፤

13 ቤርታሳህና ጋፒንፃህና፡ ዔኤቢ ቢያ ዓርቃህና ጋፒሳህያ ታናከ።»

14 ናንጎ ሚያ ዓኣፖ ሙዓኒና ካታሜሎ ጌሎ ካሮ"ና ጌላኒ ዳንዳዓያ ማዓኒ ማኣዓህ ፔኤኮ ማሰከዘንህ ባለቲና ዓኣያከ።

15 ጌኔ ማዳ ማዳይ፡ ማርሻ ማርሻይ፡ ዓኒ ሃህ ማቾ ማዒባኣያና ላሃይ፡ ዓሲ ዋዳይ፡ ሜሌ" ጾኦዘ ካኣሽካይ፡ ሎኡዙሞ ናሽካያና ሎኡቃ ዓሲ ቢያ ካታሜሎኮ ዙላ" ማዓንዳኔ።

16 «ታኣኒ፡ ዩሱሴ ሐያ ማርካቶ ማርካዳንዳጉዲ ታኣኮ ከኢታንቻህ ሸኢጲያ ማኣሮ ዓሶም ታ ዳከኔ፤ ታኣኒ ዳውቴ ዜርህ ሃህ ፃጲከ፤ ዩያጉዲ ታኣኒ ፖፖዓ ካሪህ ዠኦጌከ» ጌዔኔ።

17 ዓያኖ ጌኤዠና ዑኡቴሎና «ሙከ» ጋዓኔ፤ ሐያ ዋይዛህያ «ሙከ» ጎጾንጎ፤ ዳኤቢንቴህያ ሙኮንጎ፤ ዑሸካኒ ኮዓህያ ቢያ ናንጎ ዋኣያ ዔኤቢ ጨጉዋየ ጉሪ ዑሸኮንጎ።

18 ሃያ ማፃኣፖይዳ ፃኣፒንቴ ጾኦሲ ማሊያ ዋይዛዘንህም ቢያ ታ ላታኔ፤ ጾኦሲ ሃያ ቃኣሎ"ይዳ ፔቴ" ባኣዚ" ቃሴ"ቴ ጾኦሲ ሐያ ማፃኣፖይዳ ፃኣፒንቴ ባይሲንቶ ዒዛይዳ ቃሲ" ቃሲ" ሄሊ"ሳንዳኔ።

22:11 ዳኣኔ. 12፡10። 22:12 ዓ.ሲ. 40፡10፤ 62፡11፤ ዓይኑ. 28፡4፤ ዔር. 17፡10። 22:13 ዮሐ. ጾፕዳ 1፡8፤ 17፤ 2፡8፤ ዓ.ሲ. 44፡6፤ 48፡12። 22:14 ማኸ. ማፃ 2፡9፤ 3፡22። 22:16 ዓ.ሲ. 11፡1፤ 10። 22:17 ዓ.ሲ. 55፡1።

19 ያኦሲያ ሓያ ያኦሲ ማሊያ ከኤዛ ቃኦሎ"ይዳፓ ፔቴ" ባኦዚ" ፓጠሴቴ ሃያ ማፃኦፖይዳ ከኤዚንቴ ናንጎ ሚያ ዓኦፖና ያኦሲም ዲማጴ ካታሜሎናይዳፓ ዒዛ ሄላ"ንዳ ባኮ ያኦሲ ፓጠሳንዳኔ።

20 ሓንሣ ባኮ ማርካዳሣ፡- «ሂዮ፤ ታ ዑኩ ዩዓንዳኔ» ጋዓኔ።

ዓኦፖን፤ ጎዳ ዩሱሴ ሙኩ!

21 ጎዳ ዩሱሴኮ ኮሹሞ ዒንገፃ ዒንሣ ሲያሣና ዎላ" ማፃንጎ፤ ዓኦፖን።

Maale New Testament
The New Testament in the Maale language of Ethiopia
copyright © 2007 Bible Society of Ethiopia

Language: (Male)

Contributor: Bible Society of Ethiopia

Maale New Testament

by Bible Society of Ethiopia.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-05-13

PDF generated using Haiola and XeLaTeX on 11 Jun 2026 from source files dated 13 May 2025

48f5fdf1-90d6-5bff-b666-a2b8b5d20de1